

東
華
續
錄

光緒一百十六

臣朱壽朋敬編

臣章圭琰恭校

十一月己卯朔 上御承恩殿比國使臣陸爾業覲見○辛巳慶裕奏據喀拉沁多羅郡王旺都特那木吉勒呈稱調兵發餉例有明文我 國家深仁厚澤無論何項差役從不吝惜帑項而於蒙古藩服 恩寵尤渥光緒十七年冬口外教匪倡亂勢甚猖獗焚燒蒙古各旗距熱河僅有毛金壩一梁之隔 國庭所在關係匪輕當將本旗現有蒙兵三百名酌派輔國公林沁多爾濟等督率迎擊一面分飭各管箭扎蘭等分路募勇隨防隨剿彼時驛路隔絕外無援兵內無糧餉岌岌可危當勸諭附近鋪商量力墊發兵餉勇糧得以一力攻剿並不掣肘地方賴以保全者商民之力也查同治九年戶部奏准蒙古官兵每名日給口分銀一錢三分每馬一匹日給馬乾銀五分本旗因商民墊辦維艱極力撙節每兵每名日給銀一錢庫特勒減半每馬日給馬乾銀五分勇目每名日給銀一錢勇丁日給銀八分除所需軍裝軍火旗幟號衣由旗自行備辦外統計各鋪商墊過餉糧共銀一萬二千四百六十五兩零凱撤以後當即造冊呈請前任都統代奏償還墊餉該旗苦遭兵燹商民困累均屬實情非不願代奏乞 恩惟蒙兵剿賊係

分內之事招募兵勇從無辦過成案部議恐難照准礙難代奏飭令自行籌款還墊等因伏思本旗世受國恩食毛踐土數百餘年此等兵餉勇糧分應捐墊奈蒙古地方今非昔比近年水旱頻仍連遭荒歉困苦情形已屬堪憐繼又遭此焚掠產業蕩然一空若再加派兵費勇糧必致流離逃散如今責令銷商賠墊勢必關閉歇業左右思維難籌鉅款用敢不揣冒昧詳細瀝陳伏乞據情代奏償還墊款等情前來案查光緒十七年十一月間朝陽教匪剿平以後據喀拉沁多羅郡王旺都特那木吉勒以募勇剿匪墊過糧餉共銀一萬二千餘兩呈請代奏經前任都統奎斌駁令自行籌款還墊去後茲據復陳前情仍請代奏前來奴才查前年教匪倡亂擾及各旗惟喀拉沁受害最重彼時調派官兵尚未到境全仗該旗敵兵自行防剿實與賊匪對敵接仗雖有斬獲其陣亡亦復不少蒙古官員兵丁向無俸餉一旦驅遣應敵勢難枵腹從公其由商民墊發糧餉事所實有該旗近年連遭水旱又被兵燹其困苦情形人所共聞共見委屬無力籌此鉅款既據復懇代奏未敢擅於上聞所有喀拉沁旗墊過兵餉勇糧情形理合恭摺具陳伏乞 皇上聖鑒訓示其應否賞款歸墊之處出自逾格 恩施無任悚惶待 命之至得 旨知道了所有喀拉沁旗墊過兵餉著准其由戶部撥還○壬午諭御史林紹年奏考政不一請飭變通閱卷章程一摺著禮部議奏○兵部尚書烏拉喜崇阿因病乞休不允予假兩月調理○癸未諭軍機大臣等戶

部總理衙門奏撥光緒二十年東北邊防經費照案指撥浙江釐金銀八萬兩著該撫按照指撥銀數於來年五月前批解一半年內全數解清并稍延延○李鴻章奏光緒十九年十月十一日欽奉 寄諭御史鄭思賢奏運河水涸糧米不能挽運民食日艱請飭迅速籌辦一摺據稱近日京城糧米日見缺少實因運河水涸所有南來白米雜糧自十萬石船至楊村不能前進著李鴻章迅速添派營兵數千名將各口門寬口堵合並挑挖河身停蓄水勢以利舟行一面趕緊設法剝運糧米以濟急需等因欽此臣查本年六月間大雨兼旬口外山水暴發北運河上游潮白等河同時狂漲浩瀚奔騰建鎮而下河身不能容納水勢高過堤顛數尺原築土埝俱沒水中東西兩岸上下數百里紛紛漫決人力難施與鳳池大清子牙各河連成一片統計運河水旱大小決口七十餘處情形糜爛實從來所未有該河關係京道運道爲刻不可緩之工若令道屬次第堵辦工段過多年內勢難告成當飭統領天津練軍記名提督何永盛督帶全隊將西岸自龐家嘴河口以下東岸自張灣子以上兩岸水旱口門四十三道派令本地紳士前廣東水師提督曹克忠招集弁役民夫迅籌堵合時甫月餘該提督等將漫口六十五處一律辦竣於是楊村以下河路通行上游務關屬所屬境內尚有缺口七處責成該屬姚雪承辦先將羅屯等處六口修堵完固惟東岸紅廟水口刷寬至一百三十丈水深三丈餘工程浩大又值永定河同時興工人夫物料均

不應手驟難集事該口分泄七八成臨青龍灣減河由寶坻下寧河北塘口入海正河溜勢甚微河身節節淤淺由津運京米麥雜糧千數百艘並部購銅鉛商人販運各貨舟楫林立皆在楊村一帶阻淺與該御史所奏情形略同該口一日不堵則運道一日不通臣深爲焦急仍飭何永盛挑派練軍三千名前往搶辦並派員四出購料運濟工用該提督以老堤決口溜勢入海另在河灘生根堵築其時水勢尚淺思欲趕工節省兩頭均用四路椿辦法中間用料候鑲節節進占九月二十日工將堵合適兩後水漲又因河底流沙急湍搜刷占岸陡失數丈勢難適合復派熟悉河務之新授大順廣道吳廷斌選帶工員馳往會同該提督及通永道張紹華勘得該處河面寬僅十餘丈口門跌塘太深壘溜甚急進占甚難隨審察形勢搶築卷水盆井因新衝決口較正河身低至二丈七八尺高下懸殊必須另籌去路卽在對岸旱灘開挖引河長二百餘丈其東西兩壘築釘大椿連取膠土挑築後戩穩慎進占並於大壘上游趕築挑水壩緊逼溜勢十月初七日寅刻挑壘已成大壘兜到底操高水勢卽將運河頭戩放頃刻間大溜掣入引河趕將二壘立時搶堵填築土壘氣象頗順詎午刻西北風大作衝大壘河水陡漲三尺怒濤擊撞兩壘壘登時欲側壘身塌陷丈餘員弁兵夫數千人拚命搶辦鎮高水面數尺方將大壘保住而東壘忽從四路椿溜勢下搜出一漏孔大溜一湧而過工情自變該道等復將引河展寬五六丈並派員帶同欽

手土夫乘船下行二三十里遇有高仰之處挖溝砌灘以暢溜勢引河下首又做邊牆數十丈以防溜勢
刷通一面實碑百餘萬調派永定河熟練占墾弁兵將挑水船結實捆鎖向引河下首橫河而進並將磚
塊隨進隨拋硬過全溜以入引河卽在引河頭下首盤築壩盤留運金門四丈二十二日西壩又墊陷
七八尺趕督弁兵抬鑲並用磚船數十隻裝石盤沈攔擋溜勢二十三日刻挂纜將大壩兒子多用麻
袋滿包盛土重壓而下一氣搶堵尚未斷流趕下關門大壩並於壩外多拋磚塊晚間旋卽閉氣全溜復
歸故道溜溜南下惟該河自歲修額款減成以後河身久不挑浚歷年淤塞受病甚深此次勉強雇工艱
難萬狀若過水大之年難保不復潰決客臣籌撥款項妥議裁濬浚深之法續行具奏至於運京糧艘及
部屬銅鉛商販各貨初盼紅廟工竣可省起卸之煩嗣因工難速成時將封凍趕緊設法飭改裝小槽子
船分路前進一自陳家溝入塌河旋繞青龍灣減河至紅廟盤壩仍由運河北去一由鳳河上駛武清所
屬之侯上村起岸陸運該處距京師永定門百里兩發夕至較由通州起運所增運腳無幾似此分途並
運來源漸多郡中民食無虞缺乏堪以仰慰 宸廑各工用款繁鉅統由籌賑局湊撥歸入工撫案內彙
單開報至紅廟上游僅止鮎魚溝一口係通州所轄已由通永道委員勘辦堵築此外北運全河並無過
水口門該御史奏稱紅廟合龍尙有六處工程自屬傳聞之談至他河堵口堵壩挑淤各工尙復不少仍

應察酌程途遠近工情緩急或派練軍往辦或集災民以工代撫分別妥籌勸辦總期水有歸宿農田涸
復無誤春耕仰副 聖主慎重河防軫念民依之至意再查北運河爲京通運道所必經關係尤重該文
武等督率弁兵屯夫胼胝經營竭數十晝夜之力糜堵廢潰以底於成實屬勞績卓著所有出力員弁可
否懇 恩准其擇尤奏獎以示鼓勵得 旨覽奏均悉著准其酌保數員毋許冒濫○乙酉林紹年奏竊
維近來考事風氣卑壞弊竇叢生外間所傳令人駭怪風聞浙江一案周福清所供交通關節者已不止
一科京闈鄉會試舞弊倖中者更指不勝屈絕無顧忌一至於此良可慨矣推原其故其不謹實自大臣
始何也大臣之不講風裁者日多故過 殿廷考試相識者競以詩片粉投於其門而大臣坦然受之匪
特不卽奏參竟且樂爲搜討甚至所受之條迴於所取之數不惜諂顏代向他人通融者此非關節而何
乃小臣以躁競喪品大臣以徇庇辜 恩風俗人心尙可問哉無他私瞞情親處時禮厚遂致罔知 國
法不恤人言且曖昧之事覺察本難卽間有知者人亦憚於指實故此風日甚一日幾於視爲故常而無
從禁絕臣愚以爲欲清其源非變通閱卷章程不可查 殿試讀卷諸臣向於前期聽宣宿 文華殿等
候次日卷到校閱似可酌量仿照辦理擬請嗣後 朝考散館考差鄉會試各場均於考日宣閱卷諸
臣入 文華殿候卷校閱庶詩片之弊不禁自除若慮諸臣多此候閱時日有曠部務則閱卷員數原可

損減實成更專時刻從容亦不慮草率至供應一切則開年不過數場每場不過二日更可無慮煩費似
慎重試事先清弊源無有過於此者應否 飭部妥議變通開卷章程謹候 旨施行 臣又聞近科 殿
試內開刷印題紙之時亦竟有漏洩策題情事應如何添派官兵嚴密稽察認真關防亦請一併 飭部
妥議以期無弊得 旨覽○丙戌劉秉璋奏本年八月初五日據阜和協副將徐聯魁打箭爐同知趙墳
會稟噶達汎地方於七月十八日卯刻地震壓斃兵民傾倒房屋查看惠達喇全行震倒壓斃喇嘛多名
查噶達汎即泰凝地方雍正七年西藏被準噶爾蹂躪欽奉 諭旨建廟賜名惠達迎達賴喇嘛噶爾藏
嘉穆錯卓錫其中十二年仍回西藏留喇嘛七十一名住廟念經歲需口食衣單銀七百餘兩由爐支發
今罹此奇災當由趙墳捐發廉銀會同徐聯魁委員前往撫恤等情 臣即批飭確查已斃喇嘛若干名妥
爲安埋未斃之喇嘛若干名妥爲安置令其詳細另稟旋據該協續報查勘得實在壓斃喇嘛六十五
名分別安埋受傷者三十八名挖出 御賜赤金佛九尊銅鍍金佛數百尊黃緞繡龍轎圍一副挑耳佛
帽一頂金絲緞袈裟一件金盤龍索倫馬鞍一副該廟堪布扎靈所屬夷民房屋及噶達汎一帶並明正
土司所屬中谷八麥上下地方暨澤居小喇嘛寺四座夾壩石小喇嘛寺一座蒙子石道場等處通共震
倒夷房四百七十九戶小喇嘛寺共五座壓斃喇嘛三名漢夷兵民男女共九十八丁口又角浴汎同日

辰時地震共震倒漢房屋二百二十五戶喇嘛寺二座壓斃喇嘛六名男女三十九丁口蓋由西之夾場石至折東之中谷地震約計三百餘里等情臣查此次地震通計震倒房屋一座上喇嘛寺七座漢民房八百零四戶壓斃惠遠寺及各小寺喇嘛共七十四名壓斃漢民兵民男女共一百三十七丁口其喇嘛及兵民之受傷者共七十名臣批令將未經壓斃之喇嘛送至別處喇嘛寺妥爲安置如有失所卽惟該屬協是問其震倒漢民房卽在上年籌備賑卹積穀項下每戶給發二石共撥穀一千六百零八石其壓斃喇嘛及兵民共二百一十一名口又在機器局節省土盤項下每民給銀五兩其喇嘛及兵民之受重傷者共一百十四名每名另給銀三兩俾資養傷通計共撥給銀一千三百九十七兩以示賑恤得旨該衙門知道○丁亥兵部奏光緒十九年十月初五日內閣鈔出 東陵承辦事務衙門光裕意書奏查 陵寢向章儀行樹株歸內務府專司樹夫看守儀行樹株外卽爲海地應歸綠營專管八旗官兵有無管理樹株之責原無別例可稽溯查道光年間每次儀樹被竊之案該管官兵曾經得有處分惟此次據 欽派大臣貴恆等查辦奏明八旗官兵並不管理樹株業經欽奉 諭旨有自應仍遵前奉 諭旨作爲定章未便再行更易致相推諉除將道光十二年分界成案並 陵寢圖說一併咨送兵部查照理合恭摺具陳等因光緒十九年九月二十九日奉 硃批該部議奏欽此欽遵到部臣等伏查此案前

據欽派大臣貴恆周德潤查明稟奏光緒十八年六月十三日欽奉 諭旨 陵寢樹株關係重要經
管各員自應認真看守著光裕意曹英廉飭內務府綠營於應管儀樹海樹查照例章劃清界限各專
責成毋得稍有疏虞致滋推諉等因當經恭錄行知 東陵承辦事務衙門暨馬關鎮總兵遵照辦理嗣
據總兵英廉奏請聲明定章該八旗值班官兵各於所管地段儀行樹株仍應管理認真巡查等語經臣
部以此項樹株究應歸何員專管何員兼管八旗值班官兵有無管理儀行樹株之責請 旨飭下該總
兵仍遵前奉 諭旨會同光裕意曹詳細查明劃清界限繪具圖說畫一明定章程奏明辦理並將道光
年間分界成案鈔錄送部以憑覈辦旋據總兵英廉咨稱恭查 風水地面原有分定界限各有專責惟
孝陵神路計長十一里兩傍儀行樹株係歸 孝陵內務府司官管理樹夫看守八旗值班官兵管理
巡查其餘各 陵儀樹係某 陵地面歸某 陵內務府司官專管樹夫看守八旗值班官兵管理巡
查均歸各該總兵翼長兼管其海地樹株係某汛地面歸某汛弁兵專管看守巡查游擊守備兼管此係
向章未便更易相應將道光十二年分界成案暨道光四年十九年盜竊儀行樹株成案及前圈地面界
限圖說一併鈔錄送部查核各在案今據守陵 陵寢大臣光裕意曹奏稱恭查 陵寢向章儀行樹株
係歸內務府專司樹夫看守八旗官兵有無管理樹株之責原無別例可稽調查道光年間每次儀樹被

竊之案該管官兵等曾經得有處分惟此次 欽派大臣員懷等查辦奏奉 諭旨自應作為定讞等語
恭查該大臣總兵咨送 陵寢圖說樹夫撥房計十九處八旗值房計二十四處其道光四年十九年係
樹被竊及十二年餽餉房失火成案該八旗值班官兵與內務府司員同干嚴譴十二年分界成案內亦
無八旗弁兵不管樹株之語 臣等謹案圖說參考舊章倭行樹株內務府管理看守實有專歸決難另貸
八旗弁兵雖不專管倭行樹株惟既設立值班房二十四處則防範緝捕皆屬分所應為但為巡邏所及
卽不得置身事外誠以該大臣等既有守護之名所屬員弁均宜盡守護之職內務府職司主守八旗兼
任游巡責任雖有重輕防衛均難諉卸內務府司員與八旗值班章京均宜督率樹夫甲兵輪班駐守分
段巡查方足以重職守而昭敬慎擬請嗣後除海地樹株仍歸綠營專管外所有倭行樹株應歸內務府
專管八旗兼管以專責成 上諭兵部奏遵議管理 陵寢倭行樹株請飭分別專管以專責成一摺
陵寢倭行樹株內務府職司主守實有專歸八旗弁兵既經設值房多處則巡邏緝捕皆屬分所應為責
任雖有重輕防衛均難諉卸嗣後 東西陵樹株除海地仍歸綠營專管外所有倭行樹株卽著內務府
專管八旗兼管內務府司員與八旗值班章京務當督率樹夫甲兵輪班駐守分段巡查以專責成而昭
敬慎此次明諭之後著為定章永遠遵守毋得互相推諉致干咎戾○易俊奏撥捐始於咸豐初年其時

軍務旁午籌餉維艱特作權宜之計迫海字又安本應裁撤朝廷因出自商賈尙無大妨兼以收數頗多可補常年經費之不足故至今仍之如果委員皆潔己奉公何患釐務不漸有起色乃奉行日久弊竇叢生臣請以得諸傳聞者敬爲我皇上陳之一分填聯票也釐卡用三聯票類多大頭小尾近聞安徽江西等省創立新章凡商人完釐後經過別卡截下票邊暗縫繫總局與票根核對以防此弊他省仿而行之與否不得而知卽令仿而行之而出境貨物不能責令隔省釐卡亦遵章辦理毗連鄰省各卡委員以爲尾聯發給商人總局無從查考往往於填票時仍裁開中聯另行繕寫其銀數錢數遂任意開列一摺用小票也夫小票僅蓋圖章係本卡所出總局不得而知也鋪店各項坐釐爲數無幾按月完納給以此票固不待言至往來零星貨物謂釐少不能開票又不肯姑從寬免抽收後亦以此票給之甚有上下卡委員商同彼此私用互相照應其所收釐金委員俱攘以爲己有一不給釐票也凡貨物到卡必先驗票所以防偷漏也如完釐後仍須經過別卡若不給票商人決不能遵行惟落地銷售貨物抑或至中途起卸者委員恃無查驗之處輒與商人通同舞弊照應完之數減成抽收不給釐票商人惟利是視但略佔便宜於事無礙莫不樂從一應報開支也卡內書識司事巡丁雜役等薪水辛工與夫一切用款例准開支委員經理其事自應實用實銷不得絲毫浮冒乃從中漁利行同市儈雖所支之數亦視卡之大

小爲衡而於各項開銷不恤人言以多給少月報總局則朦混捏造以少開多假公濟私恬不爲怪一加抽盤金也商人貨物多少原有行戶底單暨前卡盤票可憑驗明後當卽按數收盤以示體恤乃委員以底單盤票爲不足據又不逐件點查故謂商人狡猾異常非在前卡購盤卽在中路添購貨物於應完正盤之外必加抽二三成始給票放行受累者無不同聲怨恨一勒取紅錢也完盤章程各省不同有兩卡相距太近在此卡已完至彼卡不再完者有第一卡完三分第二卡完二分第三卡完三分第四卡完二分完滿十分後不再完者他卡照例驗票毋得任意需索而委員謂其貨多勒要補繳若干名曰紅錢起票以賈作賤貨物亦如之一苛罰商人也商人會本逐末趨避繞越在所不免一經查出除完正盤不計外多不照章科罰有罰至數倍十數倍者商人因此傾家如從前江西之高門卡逼出人命故事所在多有其所罰之款概不歸公祇提四成爲犒賞司事等之費以外六成委員則全行乾沒一浮收折價也各卡完盤銀錢不一銀則多用折價委員並不照時值合算如應完銀一兩折收錢一千八九百文不等月終買銀起解每兩不過一千五六百文之譜是收銀一兩已浮收錢數百文統一年所收計之其浮收多寡可知而知以上諸弊相習成風幾有積重難返之勢如恐不敷比較以減讓爲招徠尙屬因公徇弊之顯焉者也充當此差者大卡動獲萬金或數千金小卡亦踰千金侵帑病民莫此爲甚推原其故總由比

較數目太少委員祇安頓聯票所填之數將旬比較造冊報局其餘都入私囊卽或微有所長亦不過稍抽入己者希圖留地步非真儘收儘解也固有盤卡僻處偏隅收數本不甚旺而委員慣積年之價充久虛之案均取給於此無怪乎比較始終短絀甘受停委記過而不辭也然此亦各省中所僅見耳可否飭下各省將軍督撫臣體察地方情形酌加比較仍以比較長短定委員功過並妥立章程消除積弊倘查有前項情事從嚴究辦庶委員咸知儆惕恪守成規縱不能涓滴歸公亦不至剝衆人之脂膏填一己之欲壑矣又奏聞盤卡司事巡丁多係委員親友及用費冒充之人查驗貨物時彼此串同一氣或自賣放或受商人賄託以多報少朋比爲奸無所不至其勒取挂號驗貨照票以及打印划子等費皆視爲故常盤金收銀要額外加平收錢要額外補數稍不遂其所欲輒百般挑剔任意留難至貨物多寡應否完盤者原有定章肩負小貿所販貨物無幾本不在完盤之數乃司事等欺其鄉愚多方需索甚至疋布斗粟亦不許空過小民畏之如虎莫敢誰何然怨聲已載道矣應請 飭下各省將軍督撫臣札飭委員嚴禁司事等藉端舞弊擾累商民並刊刻簡明告示張貼凡往來貨物如不應完盤者毋許有需索情事倘委員縱容袒庇一經查出卽行撤參如此則委員自顧考成認真防範而司事等方有所忌憚不敢復蹈故轍又奏牧令之選否民生之休戚繫焉部選實缺人員固不乏明體達用之選而初登仕版不學無

術者亦難保其必無若令民社驟騰恐不免爲閭閻之害各省雖有考校之例大半視爲具文此項人員到省照向章應考者均宜認真面試嚴防代倩傳遞之弊倘於有關吏治之事不甚通曉則留省勒限學習使之加意講求如限滿再試果能漸臻諳練始飭赴新任以專責成是澄敘官方之中仍寓造就人才之意 上諭軍機大臣等御史易俊奏條陳盤務積弊請飭認真整頓一摺所稱盤務積弊八條著各該將軍督撫體察地方情形妥立章程漸次消除積弊毋得稍涉徇縱又片奏各省盤卡司事巡丁查驗貨物輒放賄託無所不至甚至肩負小貿亦復多方需索等語著各該將軍督撫嚴行禁止如查有前項弊端卽行從嚴參辦另片奏部選實缺人員請照章面試等語著一體認真辦理毋得視爲具文原摺片均著鈔給閱看將此各諭令知之○戊子甘肅新疆地震○命龔照璣充出使英國兼法國義國比國欽差大臣○己丑李鴻章奏准軍機大臣字寄光緒十九年九月初二日奉 上諭本月據孫家鼐孫楫奏文安大城兩縣士民因安州匪徒扒堤被淹來京呈控一摺並據鴻臚寺卿劉恩溥陳奏該二縣民人呈訴情形大略相同著李鴻章派員馳往該處查勘確情嚴拿匪犯照例懲辦並妥籌辦法詳定章程不准以鄰爲壑貽害民生至災民恃衆搆訟倘查有徇勒同行等事卽將爲首之人嚴拿懲辦以儆刁風等因欽此臣查本年六七月間大雨兼旬大清河潞龍拒馬等河水勢盛漲奔騰下注又因永定河南上汎漫口匯流

竄入清河宣洩不及穿越南堤隨歸西淀水勢愈漲愈高沿淀居民厝舍田禾盡淪巨浸七月十一日夜
淀民聚眾將任邱縣壘堤地面之千里堤偷挖決口二道迭飭清河道潘駿德嚴拿匪徒搶堵口門旋將
該決口於八月十四日堵築合龍而挖堤之犯尙未就獲又添派候補道衛杰前往會同訪拿懲辦至下
游之文安大城被水各村糧租早已停徵又從優籌給賑撫體恤不爲不周乃竟結隊成羣赴京搆訟顯
有奸民倡迫同行已飭將爲首之原告宮變等傳案解省訊辦俟究明確情再行酌懲竊維直境沿河各
處地多低窪每遇盛漲卽被淹沒小民不安議命挖堤洩水貽害鄰封其罪固不可寬然使地方官實力
籌防認真緝辦何敢輕於嘗試欲使沿河無挖堤之犯其責成仍在於官查挖決河防圩岸律有盜決故
決之分盜決者罪止杖一百徒三年故決者罪止杖一百流三千里因而殺傷人者盜決則減闕殺傷二
等故決者以故殺傷論其有抗拒巡兵挖堤決口糜帑害民情節較重者例內雖無作何治罪明文查有
道光十二年南河龍窩汛十三堡奸民陳端等強挖官堤分別擬以斬絞成案可援立法本已周備定例
亦極森嚴直隸聚眾挖堤之案多係上游被淹移害下游或因河淀盛漲移害堤外民田地方官勘驗查
辦若係縣屬之民盜決本境之堤提犯嚴懲辦理尙易其有界分二縣一經扒挖此縣受害向彼縣提犯
而挖堤之民往往混推村眾承領無人卽嚴訊地保鄉長非以聲起一時狡飾卽以黑夜無從辨別爲詞

爲首及幫同扒挖之犯每至無從拿解辦理殊多掣肘地方官事前疏於防範失事以後又以挖堤之犯俱係被淹情節可憫之民類多酌量示懲從寬了結以致愚民益無顧忌紛紛效尤此直隸沿河居民一經水淹動輒聚眾挖堤之積習也臣督同臬司周馥悉心核議嚴禁挖堤不在多設治罪科條而在先定疏防處分應請嗣後直隸奸民聚眾挖堤之案除首從各犯仍分別按律定擬毋庸另設科條外其疏防挖堤之地方官但經決口過水漂沒田禾財物者如將案內幫同扒挖及聽從糾人等犯拿獲過半兼獲首犯按律懲辦免其議處其有獲犯尚未及半及首犯在逃未獲者卽照盜案以失事之日起扣限四個月題參疏防四參不獲將承緝州縣暨汛官降一級調用該管府道均照盜案督緝兼轄統轄之例議處如有殺傷多命者從重照致斃多命之例查辦倘係該縣交界鄰封關提人犯仍按隔屬關提人犯例以文到之日爲始限二十日內拿解如逾限不獲照隔屬關提命盜等案重犯分別擬罰降級如此嚴定處分使各州縣自顧考成咸知儆戒過案認真懲辦庶聚眾挖堤之風可漸熄下部議奏○庚寅王會英奏察吏之道在於安民吏循則民安吏姦則民困未有陷民於死亡而猶可稍吏治者也昨臣恭閱邸鈔見有山東撫臣福潤陳奏一摺云歷城等八州縣濱河村莊遷徙完竣並請酌保出力各員按照河工異常勞績請獎等語臣不勝駭異夫福潤之請獎以在事各員之著有微勞也在事之有微勞以辦理遷

徙之善也辦理之善與不善以遷徙之民安與不安也今姑無望其善也即僅求其無罪而亦不可得如所云八州縣者其餘七州縣不知其詳未敢臆斷第就利津一縣論之郭已莫能贖矣利津通北濱海昔年本爲斥鹵之地素無居人因近年以來海潮不常泛溢加以數年間河水溜漲稍有淤出可耕之田其實潮汐長落不時甚屬可虞並非樂土況地本苦寒牛馬與人多有凍斃即素業捕魚船戶莫不視爲畏途乃前任利津縣知縣錢鏞縱利津汛官王國柱將臨海逼近素無業主被潮之地安插災民而以離海稍遠素有業主淤出可耕之田大半奪爲己有盡租與殷實之家利其租稅居爲奇貨遂創爲可遷之說以欺上憲福潤不察其真僞被其愚蒙驅民赴海民未種地先索稅租每畝制錢二千餘文及千餘文不等通共約計二萬餘千盡飽私蠹僅科徵比視尋常地丁尤急以故離海爲遠之地不敢安插而置災民於下游海濱之處所領藩庫銀二萬餘兩本爲災民撈房買牛之用乃稍稍與民其餘盡以肥己又恐難以報銷遂逼令災民出具甘結威脅勢迫以少報多以假混真繼以後任吳兆鏞縱役逼追當嚴寒之時盡驅入海挽車牽牛怨聲載道燕巢幕上勢甚危岌福潤所謂依戀故土非依戀故土也畏死耳所謂不安本分非不安本分也求生耳夫安土重遷人之常情矧去虎得狼乎又況刑逼勢禁官呵吏罵鞭笞交加粗成村落喘息未定陡於上年十月初五日風潮大作猝不及防村舍爲墟淹斃人口至千餘名

之多甚至有今日赴海而明日遂死者不死於河而死於海不死於故土而死於異鄉是未遷之時猶可
冀其幸生既遷之後民乃至於速死也乃利津縣知縣吳兆鏐佯爲不知坐視不救哭聲遍野慘不忍聞
吳兆鏐猶爲其母慶賀祝壽大排筵宴令民送萬民衣傘此豈復有人心者被災之民有與尸赴公堂號
泣者有忍氣吞聲而不敢言者又有闔家全斃而無人控告者赤子何辜而罹此咎耶乃福潤入奏僅云
六七名口其餘匿不以聞是可忍孰不可忍據福潤奏云八州縣災民悉遷在大堤外附近高阜處所今
試問利津大堤外何曾建一房屋一莊乎此又欺罔之甚者也且錢鏞以害民之賊民欲爭食其肉福潤
不惟不斥革之反超擢爲歷城縣吳兆鏐行同市僧今猶晏然待遷是害民者錢與吳而使之害民者則
福潤也是錢與吳爲賊黨而福潤則罪之魁也而福潤猶曰稚席同登猶曰悉臻妥善將誰欺欺天乎臣
生長利津見聞較確詢問來人衆論叙同亦可知其非虛謬也至於請獎之說則尤不可解何者於害民
者而賞之豈於撫民者而反罪之刑賞不幾於倒置乎據福潤酌保在事各員其尤爲卓著者楊建烈陸
安清二員臣不知辦理利津遷民時有此二人與否設若有之則其居心豈堪設想即使二人果有勞績
果堪獎敘揆之於理功亦不足蔽罪況又未必盡善耶福潤曰慈祥誰敢不曰慈祥福潤曰出力誰敢不
曰出力臣恐自此之後唯諾成風脂韋相尙無復有爲民請命者矣然羣言藉藉欲蓋彌彰福潤雖言爲

彌縫其如輿論之衆口何臣非不知福潤身任疆圻事繁責重境內所轄耳目或有難周然此等民命所關至爲重大而猶漫不覺察若罔聞知形同聾瞶其何以帥司道監守令乎且使州縣爭相效尤玩視民瘼作何究竟伏願暫停賞格確切查核勿使此輩幸邀寬典治以殃民之罪且令姦臣奸吏稍知懲儆庶吏治有起色矣至福潤等宜如何懲處之處惟願出自 聖裁非臣下所敢擬議方今河患未弭時艱

宸慮若如所云辦理將何以善其後乎 職司言路且以民命所關重大不敢知而不言因不揣冒昧是否有當伏乞 皇上聖鑒 上諭軍機大臣等前據福潤奏邊保辦理遷民出力各員請給獎敘當交吏

部議奏尚未據該部議覆茲有人奏福潤縱吏毒民欺罔行私利津縣知縣錢鏞汎官王國柱懷利肥己後任知縣吳兆鏞縱吏驅迫所保楊建烈陳安清二員功不蔽罪請確切查核等語李鴻章轄境毗連遷民一事見聞較確著就近據派道府大員前往按照原參各節確切查明據實覆奏原摺著鈔給閱看將此諭令知之○諭軍機大臣等盧溝橋以東增築減水大壩乾隆以後具有成規事尚可行應如何擇要添築之處著李鴻章妥議具奏○壬辰大祀 天於圜丘 上親詣行禮○甲午貝子綿勳卒予祭葬命

輔國公載澤前往奠醊○乙未命鳳鳴徐會澧承修 東西陵工程○丙申諭軍機大臣等御史安維峻奏順天鄉試場內傳遞之弊爲之綫索者名曰道子請責成管號委員如能拿獲傳遞之人請分別給予

實缺升階至頂替之弊請責成出結京官親赴場門識認向專司稽查大臣投遞職名等語著禮部按照所陳各條核議具奏○以何文亮爲江西南贛鎮總兵○戊戌予故山東巡撫陳士杰建祠戰功事蹟交國史館立傳○己亥以慨捐鉅貲創建兩溪書院賞給慈利縣候選知縣朱希文五品卿銜○辛丑諭昨日在西華門內叩阼之民人鄭遠元著交刑部嚴行審訊禁門重地理宜嚴肅豈容平人擅入毫無覺察殊屬不成事體所有是日西華門外值班官員著查取職名交部議處值班之前鋒護軍統領專司門禁左右翼總兵亦有彈壓地面之責著一併交部分別議處嗣後步軍統領左右翼總兵於所屬地面務當認真稽察不准稍有疏懈致干重咎○楊昌濬奏臣前准會典館咨舉辦會典與圖說附圖式奏奉 諭旨鈔錄原奏咨行到甘肅飭前藩司張岳年會同臬司裕祥蘭州道黃雲擬議辦法通行各屬遵照辦理竊維甘肅僻在西鄙官紳兩途向少請求測算之人照會典館計里開方按切天度辦法必須實測實量方無外銷因兩招精習地輿之候選中書陸桂星由浙來甘遊歷階州直隸州知州朱宗祥與該中書商定詳細章程設局開辦惟通省幅員過於遼闊究非一二人所能爲力復在官幕中擇其姿質穎悟於算學稍能領會者十數人授以測量法門試可而行一面製造方向羅盤購備儀矩於十七年三月起派赴各路分投測量至十九年三月始將黃河上下游及東西大路各府屬州縣通行大路並邊界

地方周歷測量完竣廣募工於繪事及舊得者責成朱宗祥嚴立課程認真核辦其測量之法每路派正副二人一人從正路實量一人從小路繞折實量仍復會合一處必以各路方位開合爲準鄰封交界亦令測量過境期於犬牙相錯不致舛誤查甘肅東起西經八度西暨二十六度南起北緯三十二度北暨四十一度會典館奏頒圖幅限於方圓因分嘉峪關內八府五直隸州一直隸縣爲一總圖嘉峪關外安西州並青海爲一總圖均按章以一百烏里爲一方又八府六直隸州各爲一圖以五烏里爲一方又化平直隸縣幅員過小以十烏里爲一方仍附省府各總圖之後爲一冊至於經緯度分方位界址距里冬夏至日出日入時刻及山向河流源委詳列於說其各直隸州自治之地及府州屬地共六十七縣州縣又經徵錢糧分防佐貳十三處各爲一圖其另篇幅所不能容者定爲橫直剖分按章以十烏里爲一方別爲一冊另依地球圖例推算經度中修北斂準數繪全省總圖一幅爲稽考省城暨各府州縣以及邊關要隘蒙古部落土司番回駐紮處所天度之用茲於九月底一律告竣據藩司沈晉祥將繪成甘肅全省輿圖說裝訂上下二冊連經緯總圖呈請派員齎送會典館查核並將辦理詳細情形詳請具奏前來臣覆加考核測繪尙屬合法所輯圖說亦尙詳晰堪備 聖明採擇再開局起至事竣一切經費悉由藩司籌款支用未動正項合併聲明下所司知之○王寅祥編成奏數十年來中外貌修武備莫不講

求火器火器藉火藥以致其用於是火藥隨火器而日精其類有餅藥炸藥棉藥之名未幾而爭用栗色藥又未幾而漸尙無煙藥性愈變而愈猛術愈研而愈酷中國風氣初開往往儲藏不慎未收其用先受其害謹就臣聞見所及者爲我皇上敬陳之溯查咸豐九年二月長沙城中火藥局失慎二三里內居民無得免者漢河數處變爲平陸有一巨害幸未引動否則其患更不可思議是年秋山東火藥局失慎周圍震陷十餘里撫臣奏稱死傷姓名可查者四千餘人會奉諭旨賑卹同治六年十月武昌城內有二局中隔一湖同時被焚蓋因火藥局隴藥不檢延及製藥局轟動藥庫焚去火藥及硝磺數十百萬斤居民死者數千平地百餘丈陷爲巨浸光緒十年十一月廣東佛山鎮火藥局焚去火藥數十萬斤燒死工匠一百六十餘名轟動省城居民死傷甚衆十六年九月安徽太平府城內火藥局忽然一震駐局之營兵工匠皆不知所往縣署學宮摧燬無遺知府吳潮被壓而殞罹害者數百家各處殘肢斷體令人目不忍親今年五月廣東會城外三元里之火藥局不戒於火附近鄉村均被其患至今擇地營建尙未勘定凡此諸事久爲習見之端實非承平之福臣不過約舉梗概此外府縣城鎮之局廠林立變生意外者亦尙不可勝數羣衆何辜遭此荼毒臣竊疑此雖繫天時亦由人事奉使以來留心考察始知西洋各國火藥局必避城市稠密之地多在空曠寥廓之區其識以爲如此危險之物雖盡免危險之事所以

偶逢危險而不致多傷民命者非審於度地不爲功中國各省會城府城皆官吏軍民所駢集倉庫市廛所蓄聚萬無可備火藥之理其始蓋因標營弁兵操練調式火器稍領火藥擇地存儲當時火藥質顯而力輕數微而勢薄尙不至爲大患厥後踵事增華研製日精需用日繁當事者習焉不察方謂循舊章藏貯地並非無端創建而不知藥力已十倍於前藥數已百倍於前戒備稍疏輒釀巨厄前歲松江紳民稟請文武各官將火藥局移建城外曠地卒以經費無出而罷夫狙取攜之便者未遑顧及生靈昧久遠之國者鮮不安於玩愒臣嘗思其事而恍然慮之大抵斯民飢溺非無急救之具惟猝然震發其患有不及防勇士戰爭初無避險之心惟無故罹凶其事爲尤可憫或謂時逢劫運非人力所能挽回臣則以爲消弭劫運者惟在宸衷之惻怛或謂事關大局非仁術所能參臣則以爲保全大局者尙待朝廷之轉移伏惟皇上仁慈軫物普護蒼生可否明降諭旨通飭各省督撫臣自今以後文武各員不得在城市添建火藥局擇地築庫務求避遠或在洲汴之上或在山嶺之間倘有商民願捐鉅貲籲移舊局者均聽酌辦以順輿情如一時未能驟移不妨相機變通將尤爲猛烈之物分儲遠地徐俟妥爲經理其如何懲儆違玩之處可否勅下吏兵二部嚴定處分章程以昭劃一而垂永久如是則聖主尙好生之德官吏存警惕之懷庶民免無妄之災軍實鮮侵藏之咎一舉而數善備焉竊查各省設局無不濬濬築牆

撥兵守護然地居繁庶則蹤跡雜而竊盜時聞地處寂寥則心志壹而防衛不懈至於蓋藏宜密瞭聽宜慎庫窖宜分禁令宜嚴凡承辦此事者罔不以是爲兢兢自可無虞失事矣 上諭薛福成奏各省建築火藥庫宜在空曠寥寂之區以昭慎重等語火藥爲操防要需儲藏宜格外慎重著各該督撫酌核情形相度地勢擇空廓僻靜之處妥爲存儲至所稱承辦各員倘有經理不善請飭吏兵二部嚴定處分一摺著該部妥核具奏○乙巳 上諭 大高殿拈香○丙午諭御前大臣等奏禁門約束不嚴請將值班各員交部議處一摺朕昨日前詣 大高殿拈香還宮時神武門外人聲喧雜該前鋒護軍統領等約束不嚴咎實難辭德隆恩普著交部議處步軍統領福銀左右翼總兵崇禮長麟著一併交部議處嗣後乘輿出入經過地方該管各員務當預爲約束認真彈壓以昭嚴肅○諭巡視中城御史恩順等奏遵保五城小會出力紳董請旨獎勵一摺著該部議奏單併發○鄭思賢奏州縣一職務繁職重與民最親非蒞事日久斷未能深知民隱興除利弊乃臣聞山東州縣向有年終紛紛調缺之說近來順天各屬亦多輾轉調署實任甚少爲地擇人固屬詳慎之意但相沿日久上司藉以調劑屬吏卽藉以爲鑽營而覲覲奔競植其囑託無所不至且多一調動彼來此往兩處交代既已轉輾難清而送舊迎新吏胥又復乘機弄法滋生百弊卽有才堪任事者亦恐遽易生地不能盡其所長無益於官有損於民官民交困欲謀以

循良之治其可得乎一省如此各省亦皆相同擬令嗣後各省委署應補應選各缺照章仍以一年爲率
其有爲缺擇人量才移調者均當試署二年如果人地相宜方可酌爲調補倘寬選地弗良才不勝任或
撤或參原不爲過固不可用違其才稍爲遷就尤不可輾轉互調遇事紛更應請 飭下各省督撫府尹
悉心整頓力挽積習並 諭令吏部妥議定章隨時稽核務使缺分少一更調地方卽少一紛擾官民相
習實可漸收治理之效而屬吏各知責任既專考成亦重實緣苟且之風亦可藉以稍戢 上諭御史鄭
思賢奏各省州縣不宜輕易更調一摺著吏部議奏○丁未福錕等奏 命派查陝西正考官丁
惟昶於放差後有太監數人持票向索謝銀一案當將二酉堂書鋪商人饒丹詔研訊將供出之翰林院
編修饒士騰請 旨飭江西巡撫派員解京並將方小山楊少舫太監張姓分別嚴緝追究奏明在案旋
據楊少舫自行投首並據涑水縣將方小山緝獲送案據楊少舫供係直隸涑水縣廩生原名楊生華在
京教書本年五月有同鄉方小山託我聲言伊受二酉堂書鋪饒丹詔所託因伊族兄饒士騰與丁
惟昶均係同年轉託饒丹詔代給丁惟昶謀放四川考官方小山教我轉託我隨找聚誠之裁縫呂德魁
找得剃頭趙三轉託太監張姓謀辦等語又方小山供係直隸涑水縣人向在二酉堂書鋪寄住二酉堂
掌櫃饒丹詔託伊爲丁惟昶謀辦考官各節與楊少舫所供略同 臣等隨飭將楊少舫供出之裁縫呂德

魁剿頭趙三拿獲到案據呂德魁供係直隸南宮縣人在前宅胡同做活與楊少斯熟識楊少斯向我說
給丁姓謀辦考官之事我轉找得剿頭趙三轉求太監張姓等語又剿頭趙三供係直隸沙河人常在內
裏挑擔剿頭本年夏間我素識之裁縫呂德魁找我說有教書先生楊少斯說給丁惟禪謀放考官我隨
找得 御膳房飯局掌案太監張秀林即張三號張小峰等語查案內各犯均供有太監張姓剿頭趙三
並供明找得太監張秀林即張三號小峰各等語以上情節是否屬實必須張秀林到案環相質對方得
確情所有供出之 御膳房當差飯局掌案太監張秀林一名擬請 旨交下以便歸案審辦 上諭前
因升任御史林紹年奏參陝西正考官丁惟禪於放差後有太監持票向索觀銀並在二酉堂書鋪吵鬧
請飭查究等語當派福銀麟書徐桐認真查辦茲據奏請將太監張秀林歸案審訊所有案內各犯供稱
太監張秀林即張小峰著內務府查傳歸案審辦福銀等務當嚴飭承審各員悉心研鞫務得確情據實
覆奏○是月奧大利亞國使臣畢格哩本回國參贊古典和福署理

十二月己酉朔 上詣 慈禧端佑康頤昭豫莊誠壽恭欽獻皇太后前請安○浙江巡撫崧駿卒予祭
葬建祠事蹟交國史館立傳賞其子戶部郎中昆欽以本部郎中即補○庚戌諭軍機大臣等都察院奏
順天文安縣生員張作良等以水患太甚懇挖新河以救民命等詞繪具圖說赴該衙門呈遞據稱西淀

居九河下游夏令各河盛漲淤水無路宣洩爲各州縣巨害請添設橋座開挖新河庶幾水患可除等語
所奏是否可行著李鴻章體察情形妥議具奏○以廖壽豐爲浙江巡撫○調劉樹堂爲河南布政使以
趙舒翹爲浙江布政使趙綬渠爲浙江按察使○兵部尚書許庚身卒賜祭葬命員勒載漪前往奠賻賞
其子中書之榮卹中之賜舉人子諡恭慎○刑部奏據臺澎巡撫邵友濂緝獲交拿官犯何清簡奏請送
部治罪一片光緒十九年十月初二日奉 旨刑部知道欽此並經該撫派員押解何清簡咨送到部當
經將收禁審訊緣由附片奏明在案復查據軍機處將何清簡原保原多各案鈔交前來 臣等恭查光緒
十年七月初七日奉 上諭翰林院侍讀學士溫紹棠奏遵保人才等語候選知府何清簡著發往福建
交何璟張兆棟差遣委用欽此旋據御史丁振鐸劉恩溥以候選知府何清簡跡涉假冒先後奏參請
飭查該員履歷出身有無案據經吏部查明何清簡由文童遞保至府經歷縣丞有保案可稽由湖北改
指江蘇候補有捐冊可憑獨候選知府之案渺無實據等因具奏是年九月十一日奉 上諭前據御史
丁振鐸奏翰林院侍讀學士溫紹棠保奏之候選知府何清簡僅止捐職府經歷當諭令吏部查明具奏
嗣據奏稱該員候選知府之案查無實據茲查何清簡謝恩時所遞履歷竟敢將同治六年兩次保舉從
九品府經歷縣丞之案捏造爲保換花翎知府之案肆行欺罔藐法妄爲情殊可惡何清簡著革職拿問

解交刑部治罪等因欽此欽遵當由臣部咨行各該督撫一體查拿去後現據邵友濂將何漢簡拿獲解部臣等以該革員係奉 旨拿問之犯情罪重大迄今數年始行緝獲當即遴派司員提案嚴訊據何漢簡供稱係安徽太湖縣人於咸豐十一年投効霆軍隨同鮑超營帶親兵同治六年因克復廣東嘉應州出力案內保舉從九品遇缺卽選並賞戴藍翎又是年隨剿湖北永隆阿擒逆獲勝案內保舉免選本班以府經歷縣丞留於湖北補用並賞加鹽提舉銜隨遵例報捐改指江蘇補用十三年經福建漳州鎮孫開華調赴廈門辦理防務復隨往臺灣剿撫番社光緒六年經鮑超調募臺軍辦理山海關防務派充幫辦營務處旋經遣散伊於十年六月間來京親友見面問及是何功名一時糊塗以爲官大體面答稱係屬候選知府嗣晤溫紹棠詢及海防洋務如何辦理情形伊盡以所知而冒溫紹棠當加稱賞隨於七月初七日奏奉 諭旨恭奉之下不敢不叩謝 天恩當因溫紹棠已誤行保稱知府遂於寫履歷時捏作派保花翎知府仰蒙 召見亦未敢赴部領憑旋聞風聲不好趕卽出京前往福建適海口封禁未能到省又聞被參一時行止無措回京則畏罪不敢前立功則効命無其地浮沉數載寶貴 聖恩平夜自思罪何可恕本年秋間聞得臺灣生番不時出沒該處商務防務艱務洋務諸需布置遂卽前往欲圖効力贖罪致被拿獲等語臣等查何漢簡並未保有知府官階溫紹棠既非與之熟識往來何至以候選知府

率行列保其中雖保無訛託囑重情復飭嚴訊該革員堅供實止向親友妄稱官大希圖體面溫紹棠初次見面未經詳查遽行入奏是以於呈遞履歷時未敢聲明委無朦朧營保情事檢閱吏部查覆案據悉屬相符中等復會同都察院大理寺親提研鞫該革員堅供如前案無過飾應即擬結律載詐假官者斬監候等語此案何澹蘭原係山文童遞保府經歷縣丞因向人冒稱候選知府致溫紹棠誤以知府保薦該革員捏造遞保花翎知府奉 旨允准獎案繕遞履歷固與平空詐爲 制書者不同第明知所保官階錯誤並不據實呈明希圖朦朧混誠如 聖諭所云肆行欺罔藐法妄爲情殊可惡伏查詐爲假官例以造有憑劄者爲重無憑劄而意圖詐僞者次之但係圖騙一人圖行一事犯該軍流者卽應擬絞該革員所犯較之圖騙一人圖行一事者情節尤重雖未造有憑劄惟既經欽奉 諭旨發往福建該革員卽於 召見之先捏寫履歷呈遞以實其事較之僞造憑劄者情亦無異仍應按律問擬何澹蘭合依詐假官者斬律擬斬監候秋後處決事犯在光緒十五年三月十六日 恩詔以前應不准援免係官犯仍恭候 欽定 上諭刑部奏審明革員假冒官階按律治罪一摺官犯何澹蘭肆行欺罔藐法妄爲著依律斬監候秋後處決以昭炯戒○福潤奏山東小清河年久淤塞附近各州縣迭被水災前經籌議疏通由登萊青道盛宣懷勸集捐款邀同南紳嚴作霖辦理以工代賑光緒十七年先挑下游金家橋起至海口

一百一十餘里十八年接挑金家橋迤上至曹家坡九十七里半又至金家橋迤下起循預備河舊址沿支河二十四里以承接麻大湖上游各河之水引入新河至曹家坡迤上爲濟南府屬之歷城章邱齊東三縣原議近省工程由司局籌款辦理嗣因工繁費鉅無款可籌復飭盛宣懷勸捐挑辦一切情形經前撫臣張曜暨奴才先後具奏並聲明出力員紳不動絲毫公帑應請於事竣後擇尤保獎以昭激勵兩奉硃批著照所請該部知道欽此欽遵在案查歷章齊三縣境內曹家坡至黃大橋尙可循舊河開濬惟柴家莊至流蘇鎮原河曲折紆迴地勢高仰必須取直生開計長一百四十七里有奇一萬六千六百九十餘丈河西馬道開寬三十丈深一丈兩岸出土成塬除舊河土方外應新挑新土一百六十二萬二千餘方中多流沙泉眼工作極難每方工價通扯需銀一錢七分又修造涵洞橋梁及佔用民田應發價值共需銀二十八萬六千餘兩均係盛宣懷籌捐派委官紳於本年二月興工四月告竣稟經奴才委驗間有挑不如法者又飭加工補挑並飭妥定歲修章程以期一勞永逸從此全河通暢上游千山萬壑之水均有去路不致仍前泛濫附近居民莫不以手加額感頌 皇仁據盛宣懷查明出力各員詳請奏獎前來奴才伏查此工籌辦三年之久統共用銀至七十餘萬兩盛宣懷任登萊青道時目覩八九州縣災民昏墊之苦創議挑修因庫款支絀力籌勸捐辦理其始施工也會同南紳嚴作霖周歷各處反覆查勘或

生開或取直悉心籌度要以規復正河爲斯民永除水患故金家橋一帶開通之後水勢暢行入海博興樂安等縣卽獲秋收立見成效該道於上年調任直隸津海關道復行籌捐鉅款竟此上游之工實屬勇於任事現在全河一律深通向之漫溢爲災者固已收成有慶矣且自省城以達海口船隻流通尤爲商民利賴南紳嚴作霖候選道徐金綬經營開挖始終其事卓著勛勞蓋捐款賴盛宣懷籌集辦理工程則該紳等之力居多惟嚴作霖歷辦各省工賑事務從不邀獎今復堅辭再三出於至誠盛宣懷係實缺道員亦屬無可請獎惟有仰乞 天恩將津海關道盛宣懷候補訓導嚴作霖傳 旨嘉獎候選道徐金綬一員擬請由奴才送部引 見以昭激勵其餘出力員紳分段監修督飭事宜每當上游水發泉流洶湧工作難施之際並應相機築壩設法屏水計共開挖正河三百五十餘里支河二十餘里並海口砌灘兩岸出土成堤工程浩大核其勞績實與黃河搶險築堤無殊查光緒十二年前撫臣陳士杰挑挖小清河將出力各員照異常勞績保獎有案今工程較前倍徙實屬勞苦異常奴才按照盛宣懷所請各該員獎敘逐加確核謹分別等差繕具清單恭呈 御覽並懇 天恩俯准照擬給獎出自 鴻慈逾格得 旨盛宣懷嚴作霖均著傳 旨嘉獎徐金綬著送部引見餘著該部議奏單併發○辛亥命吏部左侍郎徐用儀在軍機大臣上行走○命壽蔭承任 觀象臺○壬子諭明歲元旦令節禮部以應行筵宴禮宜

具題請旨明歲恭逢 慈禧端佑康頤昭豫莊誠壽恭欽獻皇太后六旬萬壽所有應行筵宴自應照例

舉行以光盛典朕欽奉 懿旨元旦令節著照例行禮慈寧宮筵宴著於正月二十五日舉行其在外公

主福晉命婦均著進內行禮欽此所有應行預備事宜著禮部會同各該衙門查照例章先行敬謹辦理

○諭三載考績爲國家抡才大典近年每屆京察之年各部院衙門於所屬司員往往有舉無効殊非慎

重激揚之道本年京察屆期著各衙門堂官認真舉効如有才具庸劣不堪造就之員卽著各該堂官據

實嚴効毋得瞻徇情面稍事姑容用副循名責實至意○癸丑 上詣 奉先殿 壽皇殿行禮○甲寅

諭本日徐用儀奏承修大理寺衡平堂等處工程估款不符援案請加二成一摺此項工程著照原估四

成外准加一成實銀支領近來各項工程率於原估外請加成數殊非核實撙節之道嗣後凡有工程均

著照原估成數發給不得率請加成如工匠人等有藉詞要挾情事卽由承修大臣嚴行核辦○追予故

安徽廣德州知州何慶釗列入國史循吏傳○乙卯諭張仲忻奏考試廩生關防不嚴請量爲變通章程

等語任子授官原係國家職典應試諸生理應各知自愛至考試本有定章祇宜實力奉行不必輕於更

改嗣後監試各官務當遵照舊章認真稽察不得視為具文以杜弊端○丙辰 上詣 慈禧端佑康頤

昭豫莊誠壽恭欽獻皇太后前請安○追予故浙江按察使剛質孫於河南建祠井列入國史循吏傳○

諭巡視西城給事中桂年等奏特參疏防刦案之坊官請旨摘頂勒限一摺西城兵馬司吏目李忻於所屬刦案兩月之久賊犯尙無弋獲實屬捕務廢弛李忻著先行摘去頂戴勒限嚴緝倘限滿無獲卽著從嚴參處違礙重地捕務亟宜整頓並著五城御史嚴飭各該員弁認真防範實力巡緝毋稍懈弛○丁巳上諭 大高殿祈雪○調孫毓汶爲兵部尙書以薛允升爲刑部尙書○諭禮部奏明歲元旦令節應否舉行筵宴請旨遵行一摺所有明年元旦太和殿筵宴著照例舉行一切應行預備事宜著禮部知照各該衙門先期敬謹辦理○諭軍機大臣等有人奏書役把持勾串請飭懲辦一摺據糧戶部緞疋庫樊鈞等冒領庫欸被參有案該庫書吏均係樊姓把持朋充並無外人更換工部製造庫匠役王京屏等賂捐銜翎與工部太常寺書吏及內務府已革庫役董舒明等冒領巨欸勾串分肥等語著戶部工部內務府按照原參各節確切查明據實覆奏毋得徇涉徇隱原摺著鈔給閱看將此諭令知之○張煦奏河東鹽綱每年正加額引五千二百九十八名零行銷陝豫營三省自咸豐四年捐免後除晉省係應官運官銷外陝豫兩省改爲民運民銷嗣因散漫無稽未能通暢又改爲另募專商祇以商民本小利微不敷分布迄今懸案仍多益形疲滯近半銷數三省均勻牽算不過七成餘遂致奏銷展限年復一年光緒十二年原任河東道邁拉遜以鹽務積疲部撥甘肅新餉力難如數批解詳經調任撫臣剛毅奏交戶部議令

由藩庫代爲設法經臣前在山西藩司任內詳請由藩庫地丁項下按年籌墊銀十萬兩交該道湊解甘
餉亦經前撫臣剛毅奏明在案上年臣蒙 恩調補山西巡撫到任以來查藩庫自十三年迄今已代河
東道庫借墊銀五十餘萬兩伏思省運年荒旱錢糧徵收不濟藩庫支應浩繁日形竭蹶惟有設法整
頓鹽務以冀漸有起色俾該道應解協甘之款可以自顧不至再累藩庫亦節流之一法於大局不無裨
益當飭河東道設法認真整飭茲據該道詳稱近來陝豫鹽務疲滯已極似非變通辦理難期成效隨陳
現在情形請飭遵辦前來 臣查陝豫改招專商以後銷數非不稍增祇以商力單薄販運未能周遍各處
私鹽乘間投隙官引難於暢銷欲圖補救祇可仿照兩淮督銷局辦法仍就陝豫引商販運所有設局之
處發給官本募用商人設局派員試辦督銷添募勇丁嚴緝私販以官運彌其罅隙則私鹽可免橫行由
近而遠次第擴充官惟督運緝私商則專事營販界限分明兩無窒礙當不致有折閱虧本之虞現經臣
查有河東監掣同知張貽琯熟悉鹽務檄委該員在河東運城設立督銷總局專司其事又在陝西陝州
一帶設立陝運分局河南襄城葉縣鄭縣一帶設立豫運分局並由臣遴委分辦幫辦各員與該同知會
同辦理仍統歸該總局稽核在運庫雜款項下解解銀六萬兩以二萬兩作爲陝運官本四萬兩作爲豫
運官本先陝後豫次第辦理稍有盈餘足敷週轉可陸續歸還原本所有支發各項均由該同知彙總按

月報臣查覈並仍由河東道就近稽察如此變通辦理似於潞綱全局不無小補試辦一年後有無成效再行由臣據實奏聞至本省各屬近在目前應飭該道照舊督銷下戶部知之○戊午以祥霖爲內閣學士○額勒和布等奏臣部土司冊檔前因臣部科房於咸豐六年不戒於火焚燬無存疊經咨行設有土司省分查明造冊送部並於光緒四年九月奏請飭催旋因籌修會典刪例此項土司既無冊檔可稽又未據該省造冊送部難以纂輯成編復於光緒十七年七月十八年十一月兩次奏明僅令四川湖廣甘肅雲南貴州廣西各督撫查明所屬土司共有若干員均於何年月日設立如有原係土司續經改土歸流者亦將議改緣由及年月日期一併聲敘詳造清冊送部以憑辦理等因奉 旨依議欽此行知各在案乃屢經奏催僅據貴州巡撫咨送黔省各屬土司姓名冊到部此外甘肅廣西均未造送湖廣四川尙未造送齊全前據雲南省咨送營制總冊開有土司各員並未註明設立年月日期當將原冊咨覆該督添註送部現在亦未咨回以致纂修會典則例因而遲滯相應再行奏請 特旨飭令甘肅廣西湖廣四川雲南各督撫務照臣部所查各款迅即詳造清冊自接到此次部文之日起統限三箇月一律送部毋再延緩以憑敷辦 上諭兵部奏各省土司冊籍仍未送齊請旨飭催一摺現修會典土司一門必須各省冊籍造齊送部方可纂輯成編乃屢經該部奏催僅據貴州造送此外甘肅廣西均未咨報湖廣四川

亦未送齊至雲南咨送營制總冊開有土司各員亦未註明設立年月日期不足以資考核著甘肅廣西
湖廣四川雲南各督撫迅速造報統限於文到三箇月內一律送齊如有原係土司續經改土歸流者並
將將議改緣由日期一併詳細聲敘不得再行延宕○額勒和布等奏纂修會典各省營制須與各省所
造冊籍核對方昭詳慎是以前經臣部開列款式通行各省督撫彙訂總冊報部以憑纂輯嗣因各省造
報不齊復經臣部七次奏催並疊次咨催各在案迄今又逾限一年除直隸等省陸續造冊到部臣等派
員核對纂辦外其浙江雲南及福建臺灣等省仍未按式造送實屬任意玩延臣部應修會典專待該省
等造齊送部方可纂輯成編若仍前延宕會典告成無期殊非慎重公事之道應請 特旨飭令浙江雲
南福建臺灣督撫轉飭提鎮剋期照臣部前行款式以接到部文之日起勒限三箇月將全省各標營制
造齊總冊迅即送部毋再延緩儻再任意遲延應由臣部從嚴奏參 上諭兵部奏請飭催各省營制冊
籍以憑纂輯會典等語現修會典必須各省營制造報齊全方足以資考證所有未經咨報之浙江雲南
福建及臺灣等省著各該督撫轉飭各提鎮即行按照部頒款式統限於文到三箇月內一律造齊報部
不得再行遲延○己未諭巡視北城御史恩溥等奏參捕務廢弛之將弁請旨交部議處等語據稱該御
史等屢出查夜並無弁兵巡邏堆糧無人看守曾經牌行該營都司曾崇隆守備王玉春等置若罔聞捕

務實屬廢弛曾崇蔭王玉春均著交部議處南營參將鮑源泉遊擊唐福均有地面之責亦未能實力整頓著一併交部議處倘仍前玩泄卽由該御史等隨時奏參並著步軍統領左右翼總兵嚴飭營汛各官一體認真巡緝不准稍涉疏懈○賞給五城煮賑米石○追予故知府鄒振岳卹典洪鈞列入國史冊並傳
○庚申諭鑲白旗滿洲都統符珍等奏革員傷病身故籲懇恩施一摺已革烏里雅蘇臺將軍托克湍前赴烏里雅蘇臺將軍任時勒索騷擾被人參劾經奎斌等查明擬奏當經降旨革職托克湍變咎情節較重該旗輒爲奏懇恩施殊屬非是所請著不准行○予創立澳門鏡湖醫院候選道何仰殷旌獎○崧駿奏浙江會稽縣在籍丁憂內閣中書周福清在蘇遺僕陶阿順赴浙江正考官殷如璋舟次投遞信函經殷如璋扣留押交蘇州府收審知係囑託關節由蘇臬司委員管解陶阿順並移案到浙前據臬司趙舒翹稟報時奴才業已入閣卽飭臬司會同藩司督飭杭州府訊取陶阿順供詞並臬司鈔呈原信有馬官卷顧陳孫章又小兒字樣當查馬姓官卷馬家壇一名暨周福清之子周用吉一併扣考其顧陳孫章各姓俱無考名無憑查扣奴才出閣後當經恭摺具奏請 旨將丁憂內閣中書周福清卽行革職歸案審訊一面飭司委員前往查拿卽據周福清自行赴縣投首并飭查提馬家壇周用吉到案由會稽縣知縣俞鳳岡先後解省發委杭州府訊辦旋據差弁實回原摺後開恭奉 硃批另有旨欽此嗣准軍機大臣

字寄光緒十九年九月初二日奉 上諭有人奏考官途次拿獲投書賄囑之人請飭究辦一摺據稱浙江正考官殷如璋行抵蘇州忽有人投遞書函中有考生五人姓名並銀票一萬兩囑與關節取中經殷如璋將其人扣留嚴交蘇州府知府王仁堪看管轉解浙省訊辦等語科場舞弊例禁甚嚴若如所奏各情殊堪詫異著崧駿嚴切根究務得確情按律定擬具奏原摺著鈔給閱看將此諭令知之欽此遵 旨寄信並鈔錄原奏前來續准吏部咨考功司案呈內閣鈔出光緒十九年九月初四日奉 上諭昨據御史褚成博奏浙江正考官殷如璋行抵蘇州忽有人投遞書函中有考生五人姓名並銀票一萬兩囑與關節取中經殷如璋將其人扣留交蘇州府看管轉解浙江請飭究辦當經諭令崧駿嚴切根究本日據崧駿奏據臬司趙舒翹稟稱准江蘇臬司移咨此案並將投遞書函之家丁陶阿順解交浙省訊據陶阿順供稱係周福清令伊投信查周福清係丁憂內閣中書請飭革職歸案審訊等語案關科場舞弊而應澈底查究丁憂內閣中書周福清著卽行革職查拿到案嚴行審訊務得確情按律定擬具奏該部知道欽此欽遵轉行到浙均經恭錄轉飭訊辦去後茲據杭州府知府陳瑞審擬解由藩臬兩司會審訊據轉解前來奴才親提研鞫緣周福清籍隸會稽縣由附生中式同治丁卯並補行甲子科舉人辛未科進士十三年由庶吉士散館選授江西金溪縣知縣光緒四年因案被議改教五年遵例捐升內閣中書是年

九月到闕當差十九年三月丁憂回籍守制馬家壇係會稽縣學廩生爲翰林院編修馬傳煦之子周用吉係附生即周福清之子七月二十日周福清攜僕陶阿順由紹郡起程進京探親二十三日路過上海探問浙江正考官殷如璋與伊有年誼周福清一時糊塗起意爲子求通關節並欲爲親友中馬顧陳孫章五姓有子弟應試者囑託希圖中式俟主考允諾再向各親友告知擇其文理清通諸生列名周福清察知各親友家道殷實不患無人承應事後必有酬謝之費卽由上海僱船開駛二十五日晚至蘇州停泊周福清獨自擬寫關節一紙內開五人馬官卷顧陳孫章又小兒第八均用 宸衷 茂育字樣並寫洋銀一萬元空票一紙加具名片裝入信封二十七日正考官船抵蘇州閶門碼頭周福清囑令陶阿順先去投帖拜會如不見再投信兩陶阿順將名帖信函一併呈送正考官船上當經正考官扣留押交蘇州府收審轉解到浙飭府訊供將官卷馬家壇盛周用吉一併扣考並經奏請將周福清革職委員查拿周福清先避往上海患病隨後回籍聞拿畏罪自行赴縣投首並飭查提馬家壇周用吉到案由縣先後解省發委訊辦欽奉 諭旨遵經飭據訊認前情不諱請無預謀買求中式之人矢口不移案無遁飾查例載鄉會試應試舉子有交通囑託賄買關節等弊問實斬決卽鄉會試賄買關節無論曾否取中援引咸豐九年順天鄉試科場案內欽定 諭旨俱照本例問擬仍恭候 欽定又聞拿投首之犯於本罪上

減一等科斷等語此案革員周福清在蘇探知浙江正考官殷如璋與有年誼起意爲其子及戚友求通關節取中自寫洋票並擬就關節字樣遣僕往投卽經扣留解訊該革員亦聞拿自首徧查律例並無作何治罪專條惟查該革員中途求通關節較之交通關節已成未中者情節似有區別其所開洋票係屬自寫虛喊與議單文券不同且財未與人未便計贓科罪揆其事後聞拿投首尙有畏法之心應否比例量予酌減科斷之處恭候 欽定嗣生馬家瓊生員周用吉訊非知情業已分別斥革應與訊不知情之家丁陶阿順均無庸議函內所開顧陳孫章四姓並無主名該革員既供先未與各家商謀應免查提以省株累崇洋係屬自寫虛喊該革員又供家計貧寒應免著追關節信函等件案結附卷下刑部議奏○辛酉 上諭 慈禧端佑康頤昭豫莊誠壽恭欽獻皇太后前請安○李鴻章奏長蘆補欠積欠二款勢難補徵仍請照案推展五年允之○諭吳大澂奏安仁縣疾疫流行請撥款賑濟一摺湖南安仁縣屬本年瘟疫盛行殍殍傷稼殊堪矜憫業經吳大澂籌款分別撫恤著加恩由戶部撥給銀一萬兩交吳大澂歸還墊款餘著照所請辦理○壬戌轉李端棻爲刑部左侍郎以龍湛霖爲刑部右侍郎○癸亥諭禮部奏明年正月 慈禧宮筵宴事宜一摺朕欽奉 慈禧端佑康頤昭豫莊誠壽恭欽獻皇太后懿旨正月二十五日皇帝率領王公百官詣慈寧宮筵宴二十六日公主福晉命婦詣慈寧宮筵宴又該部另題正

月初十日應行禮儀一本著於正月二十七日在外公主福晉命婦均在內殿筵宴欽此所有二十五二十六二十七等日一切應行事宜禮部會同各該衙門詳議具奏○命翁同龢充國史館副總裁孫家鼐充會典館副總裁○追子故直隸提督李長樂於江蘇常州建祠○乙丑以籌解甘肅新餉出力予福州將軍希元等優敘有差○丙寅 上復詣 大高殿祈雪○蔣式芬奏順天府府尹孫樹霖性驕溢比復貪庸闕茸去歲經御史李慈銘參奏 欽派大臣查辦依違了結蒙 上優容不加譴諍恩亦至矣該府尹應如何猛自循省力贖前愆乃一年以來依然如故外州縣以公事到京稟謁概不予見有以賂務面稟者則曰往見治中蔡壽臻毋庸來泣伏思 畿輔水災刻虞 宵旰該府尹貴無旁貸漠然處之實屬玩視民瘼其所用屬員專視應酬之周否以爲調動如本任滿州知州沈宗謨一年之中一調署管糧通判再調署昌平三調署良鄉本任昌平州知州張兆珩始調署房山後以沈宗謨調署昌平心懷不甘百計夤緣始回昌平本任而以沈宗謨調署良鄉該二員皆係統裕子弟而張兆珩結納鑽營更無所不至其他以苞苴進者外間傳說紛紛暗昧之事 亦無從細究該府尹由其曾祖孫玉庭至伊本身四世卿相該府尹上念 國恩下省家世當清夜自反踴躍不安乃享恩澤禍馳不爲怪罔思補過日冀遷升京尹爲首善表率若再令此等劣員貪位苟祿而欲使二十四州縣吏民安不可得也 上諭軍機大臣

等有人奏京尹大員聲名惡劣據實參劾一摺據順天府府尹孫楫麟見僚屬玩視民瘼所用屬員專視應酬之周否以爲調動如本任滿州知州沈宗謨昌平州知州張兆珏皆係統轄子弟該府尹屢次調署別缺請飭查辦等語著麟書薛允升確切查明據實覆奏原摺鈔給閱看將此諭令知之○張之萬等奏光緒十九年十一月二十四日內閣奉 上諭薛福成奏各省建築火藥庫宜在空曠寥廓之區以昭慎重等語火藥爲操防要需儲藏宜格外慎重著各該督撫酌核情形相度地勢擇空廓僻靜之處妥爲存儲至所稱承辦各員倘有經理不營請飭吏兵二部嚴定處分一節著該部妥議具奏欽此欽遵到部吏部查定例各省存儲硝磺火藥該管官不加謹巡防以致失火被燬傷斃人命者該管官革職該管上司降一級留任俱公罪如僅止烘燃餘藥並無傷斃人命者該管官降二級留任該管上司罰俸一年俱公罪兵部查定例各省存儲火藥局該管各官若不加謹巡防以致被燬者將同城專管兼統各官俱革職留任不同城之兼統各官降一級留任平時防範不嚴之提督總兵罰俸一年俱公罪等語吏部查此案據出使大臣都察院左副都御史薛福成奏各省建築火藥庫宜在空曠寥廓之區並請嚴定處分欽奉 諭旨著該部妥議具奏等因欽此除由 臣部另行恭錄 諭旨移咨各該督撫欽遵外 臣等恭查該副都御史所奏各節係爲慎重民命起見各省存儲火藥其如何相度地勢妥爲存儲之處各該督撫

自應欽遵 諭旨酌覈情形變通辦理至所請嚴定處分一節臣等查各省存儲硝磺火藥該管官不加
謹巡防例定處分本以傷斃人命爲重惟火藥失火被燬傷斃人命該管官例應革職處分已嚴無可再
加應請毋庸再議其該管上司應得處分例止降三級留任公罪自應酌量加等擬請從嚴改爲革職留
任公罪至烘燃餘藥並無傷斃人命該管各官應得處分應請仍照各該例辦理兵部查各省火藥局被
燬傷斃人命武職各員並無作何議處專條現據該副都御史所奏各節係爲慎重民命起見文職現經
吏部從嚴定議武職亦應比照文職分別酌議庶足以昭炯戒應請嗣後各省火藥局如烘燃餘藥並無
傷斃人命武職各官仍照舊例辦理外其火藥失火被燬傷斃人命者武職專管官從嚴照文職該管官
例議以革職同城之兼統各官一併照文職該管上司例議以革職留任俱公罪其不同城之兼統各官
及平時防範不嚴之提督總兵仍應查照臣部舊例辦理至各省存儲火藥宜如何相度地勢擇空廓僻
靜之處存儲應由各該督撫遵 旨酌核辦理俾昭慎重 上諭吏部等奏遵議存儲火藥經理不善之
員嚴定處分章程一摺均著依議行火藥爲操防要需看守最宜謹慎嗣後各省收藏軍火處所務當責
成該管各官小心經理毋得稍涉疏虞致干咎戾○蔣式芬奏遵臣遺裔銓選無期宜量爲變通章程溯
自咸豐年間軍務之興在事文武將領或殉守城池或畢命行陣莫不同仇敵愾奮不顧身慘烈情形莫

可言喻 朝廷憫臣下殉節之苦 俯賜優卹 廕及子孫 該難廕等自蒙 賞廕後 遵例入監讀書 期滿
各就職之大小 赴部投供 候選無如 各項人員 既多 選期遲滯 或十餘年 僅到班一次 或數十年 不得一
缺 株守半生 幾同廢棄 甚至有坐困窮途 身受凍餒 者有老於京邸 舉家離散 終不得還鄉者 目覩情形
殊堪憫惻 且 恩廕人員 因選班遲滯 呈請分發 曾經吏部議准 今該難廕等事 同一律可否 飭部准
其比照 恩廕赴部 呈請分發 歸各省按班補用 於捐途選章 均無妨礙 而該臣後裔 亦得仰紹 銓襲 無
曠先業 矣 上諭 御史蔣式芬 奏難廕人員 銓選無期 請比照恩廕 准其呈請分發等語 著吏部議奏 ○
丁卯張聯桂 奏光緒八年五月 准刑部咨 酌議盜犯就地正法 章程原奏 內稱 廣西爲昔年匪亂之區 當
准就地正法 統限一年 規復舊制 實係距省 爲遠 長途恐有疏虞 亦可酌照 秋審事例 解赴該管巡道 訊
明 詳由督撫題奏 等因 當經前撫臣 轉行遵辦 在案 惟查廣西盜風未息 尙難卽復舊制 數年以來 各州
縣緝獲強劫盜犯 均於審明後 解赴該管知府 直隸 關州覆審 稟請就地正法 緣各屬地雜苗徭山深箐
寨最易藏奸 自成豐初年 土匪竄起 辦軍務垂二十年 始得以次戡定 而伏莽未淨 猶虞竊發 持械強
劫之案 隨在 皆有 無財可劫 卽擄女口 爲害實甚 非速加刑誅 無以昭炯戒 而示懲儆 惟應正法 者該州
縣必須細心研究 取錄親供 附近解赴該管道府 關州覆審 果係情真罪當 錄供由司核定 轉詳方准正

法以昭詳慎自光緒十五年七月起經前任撫臣將正法各盜犯敘具案由按季彙奏至光緒十九年夏季止各州縣決過盜犯名數供情俱已開具清單奏明在案茲查十九年秋季分據平南宜山恭城等縣先後具報緝獲各案盜犯陳亞風等十名均據該縣詳細研審各供認持械行劫得贓或拒捕傷斃事主各等情不諱所供行劫年月日期均與事主報案相符究明此外並無另犯搶劫別案錄供解經該管府州提犯覆審供情確鑿轉報臬司核明無異各該犯均係罪應斬決或應加賜示法無可貸先後由司詳報批飭隨時就地正法並飭嚴緝各案逸犯務獲究報勿稍疏懈其有獲犯尚未及半或首犯未獲者分別照例開參下刑部知之○戊辰諭御史李慈銘奏滿員保送御史可否仍照漢員之例先儘進士舉人次及廕生筆帖式一體保送考試候補御史二年以後概予截取等語著吏部議奏○諭兵部奏擬定甲午恩科武會試日期請旨遵行一摺明歲恭逢 慈禧端佑康頤昭豫莊誠壽恭欽獻皇太后六旬萬壽慶典應行禮節甚多所有考試日期自應量為變通以昭慎重明年武會試考試內外場及傳臚各日期著照該部所擬提前辦理其緝譯鄉試並武鄉試日期均依議行○己巳追予故提督王德魁祭葬事取交國史館立傳附祀張曜祠○庚午雪○沈秉成奏安徽省候補人員仍形擁擠請再展停分發一年允之○辛未 上詣 慈禧端佑康頤昭豫莊誠壽恭欽獻皇太后前請安○上御紫光閣閱寶殿○壬申

雪○上詣 大高殿報謝○諭明年恭逢 慈禧端佑康頤昭豫莊誠壽恭欽獻皇太后六旬萬壽元旦
令節 慈禧宮行慶賀禮朕欽奉 懿旨皇帝親進表文欽此所有應行禮節該衙門敬謹預備○諭
順天府奏西城寶善堂煖廬收養貧民衆多援案續請加賞米石一摺本年水災較重貧民就食尤多所
有前次賞給資善堂小米三百石不敷散放著加恩再賞給秬米四百石以資接濟另片奏來歲春撫需
米孔殷請添撥米石等語著照所請賞給米三萬石通倉米二萬石以惠窮黎該衙門知道○癸酉諭前
據內務府奏年終欠放各款需用甚多聲明請旨當諭令戶部妥議具奏茲據該部奏稱可否援照近年
成案由部添撥銀三十萬兩俾應要差明年既有新增之款不得再向部庫借撥等語著依議行庫款出
入歲有常經乃近年以來內務府屢請借撥有加無已福銀等平日不能嚴飭司員力求撙節實屬辦理
不善總管內務府大臣福銀容貴崇光立山巴克坦布均著交部議處○刑部奏內閣鈔出前任浙江巡
撫松駿奏審明革員中途遺遞信函求通關節未成聞拿自首按律議擬一摺光緒十九年十二月十二
日奉 硃批刑部議奏欽此查例載鄉會試考試官及應試舉子有交通囑託賄買關節等弊問實斬決
又鄉會試賄買關節無論曾否取中援引咸豐九年順天鄉試科場案內欽奉 諭旨俱照本例問擬仍
恭候 欽定細繹例義必考官與士子彼此商說允准或將明銀數或給予字樣一與一受方可以交通

賄賂論若係向考官賄許賄囑當被舉發破案卽與此例稍有不符恭查咸豐九年欽奉 諭旨不得以
會否取中分別已成未成其一經囑託無論考官應許與否似不得以已成論自應核其所犯之輕重悉
心妥擬庶無枉縱此案已革內閣中書周福清在江蘇探知浙江正考官殷如璋與有年誼起意爲其子
及戚友求通關節取中自寫洋票並擬就關節字樣遣僕往投卽經扣留解訊該前撫以例無作何治罪
專條未敢率行定擬惟既聲明該革員中途求通關節未成較之交通關節已成未中者情節似有區別
其所開洋票係屬自寫虛喊亦與議單文券不同所議似尙平允等詳加查覈該革員雖有交通賄賂買
之情究未遂其交通賄賂之計其事尙屬未成若竟照交通賄賂買關節例擬以斬決未免過嚴衡情酌斷
似應量予減應如該前撫所奏已革內閣中書周福清應請於斬罪上量減一等擬杖一百流三千里
據稱事後聞拿投首第以職居清要人員明知科場例禁禁嚴輒敢以身試法甘冒不韙應不准再行核
減以昭炯戒是否仍恭候 欽定如蒙 俞允 臣部行文該省將該革員減爲滿流照章發往新疆効力
贖罪該撫奏稱廩生馬家壇生員周用吉訊非知情業已分別斥革應與訊不知情之家丁陶阿順均無
庸議函內所開顧陳孫章四姓並無主名該革員既供先未與各家商謀應免查提以省拖累洋係屬
自寫虛喊該革員又供家計貧寒應免著追關節信函等件案結附卷等語均應如該前撫所奏辦理

上諭刑部奏遵議革員周福清罪名一摺據稱革員周福清於考官中途違遞信函求通關節當卽舉發破案較之已成未中者情節稍有區別應於斬罪上量予哀減擬以杖一百流三千里著候欽定等語科場弊例禁禁嚴該革員輒敢違遞信函求通關節雖與交通賄買已成者有間未便遽予減等周福清著改爲斬監候秋後處決以肅法紀而儆效尤○甲戌子故山東巡撫陳士杰於湖南本籍建祠事蹟交國史館立傳○諭給事中洪良品奏請嚴禁科場傳遞之弊以除積習等語著禮部議奏○乙亥諭朕欽奉 慈禧端佑康頤昭豫莊誠壽恭欽獻皇太后懿旨明年正月二十五日慈禧宮筵宴予入座時皇帝在納陛下東行三叩禮入座總管進奶茶賞皇帝奶茶時茶房侍衛等由殿門外捧進交總管遞與皇帝皇帝在陛下跪受行一叩禮飲畢復行一叩禮以次賞諸王大臣等俱由侍衛分派賞慶郡王奕劻進侍賞皇帝及王大臣等酒照前儀俟蒙古樂曲進殿時皇帝登納陞上總管遞與皇帝酒皇帝跪受行一叩禮飲畢復行一叩禮仍下納陞入座以次御前大臣晉興奕劻那彥圖載漪車機大臣世鐸額勒和布張之萬孫毓汶徐用儀容親王魁斌鄭親王凱奏肅親王隆勲莊親王載勛怡親王溥靜蒙古親王色旺諾爾布桑保德本楚克多爾濟郡王旺都特那木濟勒那木濟勒旺楚克察克達爾扎布達木臨達爾達克烏太布彥烏勒哲依多爾濟帕拉穆等分左右上納陞總管以次賞畢仍各入座俟齊肅人上總管太監

撤宴畢皇帝在納陛下居中向上行三叩禮諸王大臣等隨行三叩禮○諭朕欽奉 慈禧端佑康頤昭豫莊誠壽恭欽獻皇太后懿旨光緒二十年十月初三日申刻皇帝率領王公百官詣仁壽殿筵宴皇帝進爵初四日巳刻皇帝率領妃嬪等位公主福晉命婦等詣仁壽殿筵宴皇帝進爵初五日辰刻還宮初六日午刻詣 壽皇殿行禮初八日午刻還頤和園初十日巳刻御排雲殿受賀十二日卯刻皇帝率領近支王公百官等詣仁壽殿筵宴進爵十三日申刻皇后率領妃嬪等位公主福晉命婦等家宴十七日辰刻還宮皇帝在萬壽寺進膳○丙子 上御中和殿閱跳步札○戊寅給祭 太廟 上親詣行禮○是年統計出口貨直銀一萬一千六百六十三萬二千三百一十一兩進口貨直銀一萬五千一百三十六萬二千八百十九兩相抵虧三千四百七十三萬五百八兩凡徵貨稅銀二千一百九十八萬九千三百兩

臣朱壽朋敬編

臣章圭琛恭校

光緒二十年甲午春正月己卯朔丑刻 上詣 奉先殿行禮寅刻詣 堂子行禮卯刻詣 慈寧宮行禮辰刻御中和殿受禮太和殿受賀巳刻詣 大高殿 壽皇殿行禮午刻御太和殿賜廷臣筵宴○庚辰 上詣 壽皇殿行禮○上御乾清宮入宗親宴○辛巳諭朕欽奉 慈禧端佑康頤昭豫莊誠壽恭欽獻皇太后懿旨醇賢親王福晉每年著加賞銀七千兩○諭朕欽奉 慈禧端佑康頤昭豫莊誠壽恭欽獻皇太后懿旨本年大旬慶典妃嬪平日侍奉謹慎允宜特晉榮封敦宜皇貴妃著封為敦宜榮慶皇貴妃瑜妃著晉封瑜貴妃珣妃著晉封珣貴妃哲嬪著晉封哲妃璵嬪著晉封璵妃珍嬪著晉封珍妃○諭朕欽奉 慈禧端佑康頤昭豫莊誠壽恭欽獻皇太后懿旨本年大旬慶辰施恩懋賞在廷臣工克勤職守宣力有年應一體加恩以光盛典協辦大學士吏部尚書麟書著交部從優議敘協辦大學士吏部尚書徐桐著賞戴雙眼花翎戶部尚書熙敬著賞加太子少保銜並交部從優議敘戶部尚書翁同龢著賞戴花翎並賞用紫綬禮部尚書崑岡著賞戴花翎並交部從優議敘禮部尚書李鴻藻著賞戴雙眼花翎

銜並交部從優議敘兵部尚書烏拉喜崇阿著交部從優議敘刑部尚書松淮著賞戴花翎並交部議敘
刑部尚書薛允升工部尚書懷塔布均著交部從優議敘工部尚書孫家鼐著賞戴花翎並交部議敘理
藩院尚書松霖著交部從優議敘都察院左都御史敬信著賞戴花翎吏部左侍郎壽蔭著交部議敘吏
部右侍郎廖壽恆戶部左侍郎崇禮均著賞加太子少保銜崇禮並賞穿黃馬褂戶部左侍郎張蔭桓著
交部從優議敘戶部右侍郎陳學棻著交部議敘禮部左侍郎長麟著賞加頭品頂戴並交部從優議敘
禮部左侍郎錢應溥禮部右侍郎景晉均著交部議敘禮部右侍郎李文田著賞戴花翎兵部右侍郎克
們泰兵部右侍郎徐樹鉉刑部左侍郎阿克丹刑部左侍郎李端棻刑部右侍郎裕德刑部右侍郎龍湛
霖工部左侍郎鳳鳴工部左侍郎汪鳴鑾均著交部議敘署工部右侍郎英年著補授工部右侍郎並交
部議敘理藩院左侍郎志穎理藩院右侍郎慶福倉場侍郎祥麟倉場侍郎許應騷均著交部從優議敘
盛京戶部侍郎綿宜著交部議敘盛京禮部侍郎文興盛京兵部侍郎啟秀盛京刑部侍郎文煦盛京工
部侍郎鳴秀均著交部議敘鑲藍旗蒙古都統恩佑著賞加太子少保銜正白旗漢軍都統定安著賞戴
雙眼花翎鑲紅旗蒙古副都統廣忠著賞加都統銜內務府郎中文琳著賞加侍郎銜○諭朕欽奉 慈
禡端佑康頤昭豫莊誠壽恭欽獻皇太后懿旨本年予六旬慶辰所有內務府上書房行走各員供職克

勅宜加恩賞都察院左都御史徐郁著賞加太子少保銜國子監祭酒陸潤庠著賞加三品卿銜國子監司業吳樹梅著賞加四品銜翰林院編修張百熙陸寶忠均著賞加五品銜徐郁陸潤庠吳樹梅張百熙陸寶忠並均著戴花翎兵部左侍郎王文錦工部右侍郎徐會澧均著賞戴花翎詹事府右庶子李培元翰林院侍讀高釗中翰林院侍講張仁黼五品銜翰林院修撰曹鴻勳均著賞加四品銜翰林院編修高廣恩著賞加五品銜○諭朕欽奉 慈禧端佑康頤昭豫莊誠壽恭欽獻崇熙皇太后懿旨予大旬慶辰在廷臣工業經降旨加恩因念各省文武大臣有久膺重寄卓著勤勞允宜同膺懋賞大學士直隸總督李鴻章著賞戴三眼花翎伊子李經邁著以員外郎用兩江總督劉坤一著賞戴雙眼花翎陝甘總督楊昌溶著賞加太子太保銜四川總督劉秉璋閩浙總督譚鍾麟均著賞加太子少保銜湖廣總督張之洞著交部從優議敘兩廣總督李瀚章著賞加太子少保銜雲貴總督王文韶著賞戴花翎並交部從優議敘河東河道總督許振祿漕運總督松椿均著交部從優議敘江蘇巡撫李俊安徽巡撫沈秉成山東巡撫福潤山西巡撫張煦河南巡撫裕寬陝西巡撫鹿傳霖甘肅新疆巡撫陶模浙江巡撫廖壽豐福建臺灣巡撫邵友濂江西巡撫德馨湖北巡撫譚繼洵湖南巡撫吳大澂廣東巡撫剛毅廣西巡撫張聯桂雲南巡撫譚鈞培貴州巡撫崧蕃均著交部從優議敘盛京將軍裕祿著賞加尚書銜吉林將軍長順黑龍江將軍

軍依克唐阿西安將軍榮祿寧夏將軍鍾泰江寧將軍豐紳杭州將軍吉和荊州將軍祥亨廣州將軍繼格均著交部從優議敘福州將軍一等繼勇侯希元著賞戴花翎成都將軍恭壽綏遠城將軍克蒙額伊犁將軍長庚定邊左副將軍永德熱河都統慶裕察哈爾都統慈銘直隸提督葉志超均著交部議敘陝西提督雷正綰甘肅提督周達武烏魯木齊提督董福祥均著賞加尙書銜江南提督譚壽理著賞加太子少保銜浙江提督馮南斌福建水師提督楊岐珍均著賞加尙書銜福建陸路提督黃少春著賞加太子少保銜廣東水師提督鄒紹忠廣東陸路提督唐仁廉均著賞加尙書銜廣西提督蘇元春著改爲二等輕車都尉湖北提督吳鳳桂著交部議敘湖南提督婁雲慶四川提督宋慶雲南提督馮子材貴州提督羅孝連長江水師提督黃翼升北洋海軍提督丁汝昌均著賞加尙書銜河南河北鎮總兵劉盛休廣東南韶連鎮總兵方友升廣東高州鎮總兵左寶貴廣東北海鎮總兵王孝祺廣西右江鎮總兵張春發廣西肇慶鎮總兵馬盛治雲南開化鎮總兵蔡標雲南昭通鎮總兵何雄輝貴州安義鎮總兵蔣宗漢貴州古州鎮總兵丁槐貴州威寧鎮總兵蕭元瑞均著賞戴雙眼花翎直隸正定鎮總兵徐邦道山西太原鎮總兵喬士成河南南陽鎮總兵崔廷桂歸德鎮總兵楊玉書甘肅寧夏鎮總兵衛汝貴江南淮揚鎮總兵潘萬才江西九江鎮總兵朱淮霖福建福寧鎮總兵曹志忠廣東瓊州鎮總兵滕嗣林湖北宜昌鎮總

兵傅廷臣均著賞給如意一柄用寶壽字一方直隸馬關鎮總兵文瑞浙甯鎮總兵志元通永鎮總兵吳育仁宣化鎮總兵王可陞山東登州鎮總兵章高元兗州鎮總兵田恩來曹州鎮總兵王連三陝西陝安鎮總兵姚文廣漢中鎮總兵孫金彪甘肅西甯鎮總兵鄧增江南蘇松鎮總兵張景春福山鎮總兵韓晉昌浙江温州鎮總兵張其光福建汀州鎮總兵宋得勝湖南永州鎮總兵賈起勝雲南鶴麗鎮總兵岑有富臨元鎮總兵姜桂題長江水師湖南岳州鎮總兵張捷晉長江水師漢陽鎮總兵高光効長江水師江南瓜州鎮總兵謝澤倉長江水師江南狼山鎮總兵曹德慶北洋海軍左翼總兵程幹曾北洋海軍右翼總兵劉步蟾均著賞給用寶壽字一方大卷八綵緞一疋直隸大名鎮總兵吳殿元天津鎮總兵羅榮光山西大同鎮總兵程之偉陝西延綏鎮總兵蔣雲龍河州鎮總兵汪彥和甘肅肅州鎮總兵李培榮涼州鎮總兵張永清伊犁鎮總兵張俊阿克蘇鎮總兵黃萬鵬江南徐州鎮總兵陳廣恩安徽壽春鎮總兵任祖文皖南鎮總兵李占椿江西南贛鎮總兵何明元浙江處州鎮總兵陳濟清衢州鎮總兵喻俊明定海鎮總兵陳永春海門鎮總兵孫昌凱福建漳州鎮總兵侯名貴建州鎮總兵秦懷元澎湖鎮總兵周振邦臺灣鎮總兵萬國本南澳鎮總兵劉永福廣東潮州鎮總兵劉世俊碣石鎮總兵鄧萬林廣西右江鎮總兵董履高湖北鄖陽鎮總兵何長清湖南鎮總兵周瑞龍綏靖鎮總兵陳海四川重慶鎮總兵錢

玉興建昌鎮總兵劉世奇松潘鎮總兵王金龍川北鎮總兵何秉龍雲南騰越鎮總兵張松林貴州鎮遠鎮總兵郁耀曾均著賞給用寶壽字一方小卷八綵緞二件前甘肅新疆巡撫劉錦棠著皆封一等男前福建臺灣巡撫劉銘傳著開復革職留任處分○壬午諭朕欽奉 慈禧端佑康頤昭豫莊誠壽恭欽獻皇太后懿旨本年六旬慶辰允宜特沛恩綸擬延中外懋賞之典首重親賢恭親王奕訢著賞給御書匾額一方並賞添頭等護衛一員二等護衛一員三等護衛二員肅親王載灃著賞戴三眼花翎睿親王魁斌鄭親王凱泰均著賞穿黃馬褂肅親王隆勳著交宗人府議敘莊親王載勛著賞穿黃馬褂怡親王溥靜著賞戴三眼花翎順承郡王訥勒赫著每年加賞銀二千兩貝勒載瀅載濤均著賞穿黃馬褂貝勒載瀋著交宗人府從優議敘貝子奕謨著賞穿黃馬褂鎮國公載洵著賞戴三眼花翎輔國公榮祿輔國公載卓均著交宗人府議敘不入八分輔國公載濤著賞用紫緞鎮國將軍載濟頭品頂戴載僖頭品頂戴溥儀二品頂戴溥偉均著交宗人府議敘御前大臣克勤郡王晉祺著賞穿四團正龍補服並每年加賞銀二千兩慶郡王奕劻著皆封慶親王喀爾喀扎薩克親王那彥圖著賞穿黃馬褂並賞用黃緞貝勒載漪著皆封端親王軍機大臣禮親王世鐸著賞食親王雙俸並賞添頭等護衛一員二等護衛一員三等護衛二員藍甲二十分大學士額勒和布大學士張之萬兵部尚書孫毓汶均著賞戴雙眼花翎並用紫

糧吏部左侍郎徐用儀著賞加太子少保銜並敘穿戴膳貂褂御前行走奈曼郡王瑪什巴圖爾著交該衙門從優議敘貝勒載瀝著賞穿黃馬褂喀拉沁貝勒熙凌阿著賞用紫韁貝子溥倫著賞加貝勒銜輔國公載澤著賞封鎮國公科爾沁輔國公那蘇圖著賞穿黃馬褂科爾沁輔國公博迪蘇固倫額駙公符珍均著賞用紫韁御前侍衛和碩額駙扎拉豐阿著賞用固倫和碩用補服承恩公桂祥著賞加不入八分輔國公銜鎮國將軍溥侗頭品頂戴溥儀均著賞封一等鎮國將軍乾清門行走不入八分輔國公載瀾著賞食鎮國公俸鎮國將軍載瀛鎮國將軍載津均著賞加不入八分輔國公銜頭品頂戴載振著賞封二等鎮國將軍內務府大臣大學士福錕著賞戴雙眼花翎吏部右侍郎崇光戶部右侍郎立山兵部左侍郎巴克坦布鎮黃旗蒙古都統容興均著賞加太子少保銜福錕崇光立山巴克坦布容興均著賞穿戴膳貂褂○諭朕欽奉 慈禧端佑康頤昭豫莊誠壽恭欽獻崇熙皇太后懿旨本年予六旬慶辰中外臣工業經降旨加恩軍機章京承書諭旨夙夜在公允宜量予恩施三品銜卽選道戶部郎中如松著賞加二品銜四品銜刑部郎中桂春著賞戴花翎四品銜戶部郎中延祉著賞加三品銜戶部郎中和爾慶額著賞加四品銜理藩院卽補郎中多壽著俟補郎中後賞加三品銜四品銜理藩院卽補郎中志模著賞戴花翎知府頂戴兵部卽補郎中惠兆四品銜禮部郎中魁麟均著賞加三品銜同知銜理藩院題書主

事暨陞額著賞加四品銜二品銜光祿寺卿壘岫著賞食二品俸戶部郎中孚珩著賞加四品銜四品銜
卽補郎中瀛桂著俟補郎中後賞加三品銜理藩院卽補郎中特圖慎著賞戴花翎四品銜兵部卽補主
事穆克登額著俟補郎中後賞加三品銜戶部卽補郎中慶廉著賞加四品銜四品銜戶部卽補郎中榮
需著俟補郎中後賞加三品銜四品銜理藩院員外郎承祐著俟補郎中後賞加三品銜光祿寺卿沈恩
嘉著賞加二品頂戴通政使司副使顧瑛著賞加三品銜吏部主事徐士佳著賞加五品銜四品銜戶部
卽補員外郎馮汝驤著俟補郎中後賞加三品銜工部卽補員外郎張正培著賞加四品銜內閣候補中
書胡祖謙著賞加五品銜四品銜禮部員外郎郭仲昶著俟補郎中後賞加三品銜刑部候補主事李彝
賓著賞加五品銜四品銜候補員外郎王汝濟著賞戴花翎四品銜工部郎中徐迪新著賞加三品銜吏
部員外郎孫朝華戶部郎中王頌蔚刑部員外郎李鑾吏部主事王嘉禾戶部卽補郎中連文沖內閣卽
補侍讀郭之全戶部卽補郎中李開章均著賞加四品銜○癸未諭朕欽奉 慈禧端佑康頤昭豫莊誠
壽恭欽獻皇太后懿旨本年予六旬慶辰率土膺歡蒙古王公等自應一體加恩以彰慶典科爾沁和碩
圖什業圖親王色旺諾爾布桑保著賞穿帶膳貂褂烏珠穆沁和碩車臣親王阿勒坦呼雅克圖著賞用
紫纓喀喇沁親王銜多羅郡王和碩額駙旺都特那木濟勒著每年加賞銀一千兩蘇呢特親王銜

多羅都楞郡王那木濟勒旺楚克著賞穿帶膳貂褂敷漢親王銜多羅郡王達木林達爾克著賞用紫緞
科爾沁多羅郡王那蘭格喀勒著賞穿黃馬褂扎賽特多羅郡王旺喇克帕拉齊敷漢多羅郡王察克達
滿扎布喀爾喀郡王銜多羅貝勒貢桑珠爾默特均著賞穿親王補服翁牛特郡王銜多羅達爾漢岱濟
貝勒德木楚克蘇隆著賞用黃緞阿巴哈那爾多羅貝勒額外侍郎達木定扎布著賞戴三眼花翎阿巴
哈那爾貝勒銜固山貝子多特諾爾布著賞用紫緞鄂爾多斯貝勒銜固山貝子扎那濟哩第著賞戴三
眼花翎喀爾喀固山貝子托果瓦著賞穿黃馬褂扎魯特鎮國公達瓦齊保著賞戴雙眼花翎科爾沁鎮
國公喇什敏珠爾著賞用紫緞郭爾羅斯輔國公圖布烏勒濟圖著賞穿黃馬褂喀喇沁頭等塔布薩多
羅額駙貢桑諾爾布喀喇沁二等塔布薩和碩額駙那木扎勒色丹均著賞加輔國公銜科爾沁碩卓哩
克圖親王丹色里特旺珠爾翁牛特親王銜多羅都楞郡王贊巴勒諾爾布均著賞用紫緞科爾沁多羅
扎薩克圖郡王烏泰著賞穿黃馬褂科爾沁多羅賓圖郡王敏噶布扎布阿巴噶多羅郡王揚桑均著挑
在御前行走阿克噶多羅卓哩克圖郡王布彥烏勒哲依浩齊特多羅額爾德呢郡王都昂東僧格均著
賞戴三眼花翎土默特郡王銜多羅貝勒色凌阿那木濟勒旺寶著賞用紫緞扎魯特多羅貝勒桑巴著
挑在御前行走科爾沁多羅貝勒濟克丹達克齊瓦著賞用紫緞科爾沁多羅貝勒凱畢阿喇科爾沁多

羅貝勒巴咱爾濟哩第均著挑在御前行走蘇呢特多羅貝勒索特那木多布沁著賞戴雙眼花翎鄂爾
多斯多羅貝勒喇什扎木蘇著賞用紫綬鄂爾多斯貝勒銜固山貝子察克多爾色楞喀爾喀固山貝子
敏珠爾多爾濟均著賞戴雙眼花翎杜爾伯特固山貝子喇什彭蘇克著賞穿黃馬褂巴林固山貝子杜
英固爾扎布著挑在御前行走阿克噶固山貝子貢多桑保著賞戴雙眼花翎鄂爾多斯固山貝子阿爾
賓巴雅爾著賞用紫綬郭爾羅斯鎮國公噶爾瑪什第烏喇特鎮國公色楞那木濟勒烏珠穆沁輔國公
圖普欽扎布均著挑在御前行走敖漢頭等台吉色凌端魯布翁牛特頭等台吉花連均著賞加輔國公
銜蘇呢特頭等台吉銜協理二等台吉察克都爾色楞郭爾羅斯二等台吉阿木爾霍畢烏喇特二等台
吉索特那木旺珠爾多爾濟均著賞給頭等台吉郭爾羅斯四等台吉齊木特薩木丕勒著賞給三等台
吉阿拉營和碩親王多羅特色楞著賞穿帶腰貂褂喀爾喀多羅郡王哲丕勒多爾濟喀爾喀多羅郡王
多爾濟帕喇穆均著賞穿親王補服喀爾喀多羅貝勒車凌桑都布著賞戴三眼花翎青海多羅貝勒拉
旺多布濟著賞穿黃馬褂喀爾喀固山貝子普爾布扎布喀爾喀固山貝子旺楚克察克達爾均著賞用
紫綬阿拉營鎮國公阿吉爾扎那著賞加貝子銜喀爾喀貝子銜輔國公達什拉布坦著賞穿貝勒補服
察哈爾輔國公濟楚克扎木蘇青海車林端多布均著賞穿貝子補服喀爾喀貝子銜頭等台吉勒旺喀

克津著賞加貝勒銜喀爾喀公銜二等台吉巴保多爾濟著賞加貝子銜喀爾喀車臣漢德木楚克多爾濟著賞用黃緞喀爾喀圖什業圖漢那遜克圖著賞穿黃馬褂喀爾喀和碩親王那木濟勒端多布著賞用紫緞喀爾喀多羅郡王鄂特薩爾巴扎爾著挑在御前行走青海多羅郡王幹柯濟爾噶勒青海多羅郡王棍布拉布坦均著賞用紫緞青海固山貝子棍楚克拉旺丹忠著賞加貝勒銜青海固山貝子吹木丕勒諾爾布喀爾喀貝子銜鎮國公車林呢瑪均著賞戴雙眼花翎阿拉善鎮國公沙克都爾扎布著挑在御前行走喀爾喀輔國公德哩克多爾濟著賞戴花翎喀爾喀輔國公貢楚克扎布青海輔國公羅布桑端多布均著賞戴雙眼花翎察哈爾輔國公車旺呢克靖著賞戴花翎伊克明安輔國公巴克莫特多爾濟著賞戴雙眼花翎喀爾喀鎮國公銜頭等台吉車林端多布喀爾喀鎮國公銜頭等台吉那遜布彥濟爾噶勒均著賞加貝子銜喀爾喀公銜頭等台吉呢朗瓦爾喀爾喀公銜頭等台吉潤多畢拉布帕喇木多爾濟阿拉善公銜頭等台吉勒旺布哩克濟勒均著賞加貝子銜喀爾喀頭等台吉桑旺車林多爾濟喀爾喀頭等台吉哈丹均著賞戴花翎喀爾喀頭等台吉車林多爾濟著賞加輔國公銜阿拉善二等台吉哲勒思呢什爾均著賞給頭等台吉○諡本日理藩院具奏事件右侍郎慶福召見未到該衙門堂官均未呈遞牌牌殊屬非是理藩院尙書松霖左侍郎志顏右侍郎慶福均著交部議處○諭上年順

天直隸各屬被水成災業經分別蠲緩糧租並截撥銀米小民諒可不致失所惟念今春青黃不接之時民力未免拮据加恩著將通州三河武清寶坻薊州香河寧河霸州保定文安大成同安永清東安大興宛平夏鄉房山涿州順義懷柔密雲灤州盧龍清苑安肅定興新城博野容城蠡縣安州高陽河間獻縣肅寧任邱吳橋天津青縣靜海鹽山開州東安長垣豐潤玉田隆平深州武強饒陽安平等五十四州縣內成災五六七八九十村莊應納本年春賦地丁錢糧各項旗租著緩至本年麥後徵收又勘不成災之昌平滿城豐都完縣邢州滄州南皮無極邯鄲靈壽等十州縣內徵收三四分村莊應納本年春賦照常徵收其原緩至本年麥後徵收同徵收四分村莊應納光緒十九年並節年地丁錢糧各項旗租同徵收三分村莊應納節年地丁錢糧各項旗租均著緩至本年秋後徵收凡有應徵屯米穀豆草束鹽課學租通津二幫屯租旗產錢糧海防經費汎地錢糧儲備軍餉廣恩庫租永濟庫租兵部馬乾租鑾儀衛租代徵租及出借倉穀籽種口糧牛具等項隨同正項糧租分別緩徵津軍糧章漁課納糧地段內有坐落武清天津兩縣者歸入該二縣災歉村莊一併查辦又保定縣尊賢崇坊二里並張家里等九村應徵光緒十九年下忙地丁錢糧各項旗租著緩至本年麥後徵收以紓民力○調奕劻爲鎮黃旗領侍衛內大臣晉祺爲正黃旗領侍衛內大臣○乙酉諭軍機大臣等有人奏寶坻被災最重懇恩奏賑並設法宜洩蓄

水各摺片據稱上年寶坻被水現在縣境之大口屯黃莊八門城各市集向在水中被災極重者實有四百各村請飭妥籌賑濟該處設涵洞稟官啟開房甚多方訛索並經設法宣洩等語所奏該處被災情形殊堪矜憫著孫家鼐孫毓汶派幹員詳細查明妥爲籌畫奏明辦理毋任災民失所又片奏署寶坻縣知縣張鑑性情狡猾行止卑劣玩視民瘼向百姓估借銀兩各節著孫家鼐等一併查明據實參奏不得稍涉徇隱原摺片均著鈔給閱看將此諭令知之○諭本日兆珏承蔭奏請續假各一摺兆珏承蔭均充委散秩大臣差宜如何勤奮趨公以期毋曠職守乃自去年以來屢次請假竟至二百餘日之多實屬任意偷安兆珏著開去委散秩大臣回旗當差承蔭請假竟至六十餘日殊屬非是著交部議處近來各衙門人員往往疾病請假幾於無日無之及至 皇太后聖駕及朕乘輿出宮應行站班人員亦多有不齊殊屬不成事體嗣後務當振刷精神各勤職事倘仍蹈前轍定行從重懲處不貸○余聯沅奏查吏部例載各項漢小京官俸滿內用者仍歸各原班論俸內升外用者應升主事之小京官以同知註冊又記名外用人員論俸應升京職到班仍准升用其記名同知之小京官升任主事核其外用與原職不復相同者將從前記名查銷相同者均准帶於新任等語定例如是誠以小京官歷俸六年始得截取保送至諭俸到班又不下十餘年其中多有正途出身人員學優而仕歷事已深故凡保外用者仍准內升所以

敘資勞疏壅滯也乃臣聞此項人員自咸豐以後內升到班者自無一二推原其故由月選條內雙月推升單月京升均止詳甄別內用班次而於定例論俸應升之正班轉未敘及伏思各項京官自郎中以下記名外用後均仍得論俸內升獨此項應升主事之小京官雖例有內升明文而選舉幾成虛設因詳核例意各項小京官合十五衙門數十餘員既均以主事爲進階自係以論俸推升京升爲正班而別無甄別內用俸滿指揮應較奉旨日期者爲一班特別意簡渾未及詳爲分晰以致日久不察轉將正班遺漏與定例顯相枘鑿於銓法殊未平允現在各衙門人員擁擠雖疊經奉旨飭議疏通而小京官既無題缺內外用又限以一途應如何申明例文俾不至於壅滯應請旨飭部妥議施行以符部章而歸劃一上諭給事中余聯沅奏各項漢小京官俸滿截取內用人員壅滯請飭部申明例文疏通班次等語著吏部議奏○丙戌時享太廟上親詣行禮○諭朕欽奉慈禧端佑康頤昭豫莊誠壽恭欽獻崇熙太后的懿旨本年予六旬慶辰所有內務府掌儀司營造司造辦處各員承辦差務較繁尙屬勤奮自應量予恩施掌儀司員外郎莊山世奎均著以三院卿題奏員外郎文麟著賞食四品俸筆帖式文緒嵩春廣成衍慶廣崇福均著賞食六品俸營造司當差之都虞司郎中文瑞銀庫郎中繼祿均著以三院卿題奏長春園員外郎文德會計司員外郎福喜均著賞食四品俸筆帖式廷輔惠爾立順齊秀德福端緒均

著賞食六品俸造辦處郎中廣英文林員外郎德峻廣嵩均著賞食四品俸主事英斯文聯均著賞食五
品俸庫寧安福英文常興榮錕德慶連茂文和山捷誠晉華恆均著賞食五品俸筆帖式桂榮恩以文庫
興會恆順德貴增福吉純德連瑞成清山文泰玉振兆廉均著賞食六品俸造辦處兼行郎中祥煜員外
郎金聲文炳均著賞食四品俸其電燈公所當差之三品頂戴江蘇候補道岳樸著賞加二品頂戴四品
銜吏部郎中榮惠著賞食三品俸○諭朕朕奉 慈禧端佑康頤昭豫莊誠壽恭欽獻崇熙皇太后懿旨本年
子六旬慶辰所有御前乾清門侍衛平日當差尚勤允宜量加恩賞御前侍衛護軍統領芬車著賞加頭
品頂戴護軍統領辰音布副都統福森布希朗阿明安色楞額恩壽均著賞戴花翎乾清門侍衛前鋒統
領鎮國將軍德隆護軍統領輔國將軍德光均著賞給將職俸一年護軍統領奕功著賞給職任俸二年
署護軍統領侯克勤著賞給將職俸一年副都統愛隆著賞給職任俸二年副都統鎮國將軍普著著賞
給將職俸一年副都統玉書著賞給職任俸二年委散秩大臣鍾秀德壽溥博均著賞給散秩大臣俸一
年頭等侍衛志均訥欽泰卓凌阿瑞啟都凌阿全福成安伊立布霍倫泰伊勒洪阿常貴均著加賞頭等
俸二年二等侍衛良泰文啟崇蘭車林巴布文璞毓麟榮斌榮和晉旌貴祿均著加賞二等侍衛俸二年
三等侍衛普徽色清額全山松壽景厚錦良松尊榮福四等侍衛郭拉明阿均著加賞三等侍衛俸二年

藍翎侍衛忠清阿奇車布廣祥恩科富呢雅幹連瑞均著加賞藍翎侍衛俸二年其奏事處當差之四品頂戴兵部員外郎英文著賞加三品銜內閣侍讀監紳布著賞食五品俸內務府郎中錫恆著賞加四品銜內務府員外郎恩鎮著賞食四品俸四品銜戶部員外郎春慶副護軍參領銜內務府員外郎文煦均著賞加三品銜○丁亥 上諭 慈禧端佑康頤昭豫莊誠壽恭欽獻皇太后前請安○上御紫光閣賜蒙古王公筵宴○德馨奏查明江西各屬被災情形請將新闢錢漕分別緩徵遞緩允之○諭劉樹堂奏查明各屬荒廢未種田地山塘蕩漫並新種之產請將地漕等項分別徵蠲一摺浙江各屬荒廢未種各產經該撫督飭屬員認真查勘除已經墾闢外所剩多係瘠瘠之區若將地漕等項照常徵收民力實有未逮加恩著照所請所有杭州等大府屬錢塘等二十六縣暨杭嚴衛杭嚴二所除新墾田地山塘蕩漫一百十頃九畝零應照科則徵收錢糧外其仍荒未種鹽沙淤築塘挖掘漳塗坍塌並淹亡未報荒蕪缺額民屯沙牧學籍各田地山塘蕩漫共四萬八千一百四十九頃六十二畝零應徵光緒十九年地丁等項正耗錢糧漕白行月南秋正耗等項米石沙牧學籍等租銀錢著全行蠲免其臨安新城於潛昌化安吉孝豐等六縣共新墾田十三頃七十九畝零著於十九年全蠲二十年半蠲錢糧當陽餘杭臨安於潛昌化龍游並杭嚴衛杭所共新墾民屯田地山塘蕩漫三十二頃一畝零著酌徵五成以紓民力餘著

照所議辦理○庚寅劉秉璋奏查本年夏間建昌鎮屬夷匪出巢焚掠當經臣將剿辦情形並陸續添募勇丁緣由具摺奏陳欽奉 硃批知道了即著督飭該員弁等實力剿辦毋任蔓延滋擾餘依議該部知道欽此旋據建昌鎮劉士奇寶遠府唐承烈陸續報北山夷酋何甬沈雖已擒斬而各悍夷踞聚村堡時出搶殺不肯退散該鎮府以隘口紛歧前次募勇一營及所調制兵兩營僅敷堵禦不敷進剿因即遵批續募一營以原募者為建甯中營令留川補用知縣羅秉文管帶以續募者為建甯前營令留川補用副將周勝得管帶遵於七月初二日開拔進剿分割結進落屬石羅等處初五六日連次接仗陣斬夷首十六級鎗斃數十名夷眾退潰我軍亦有傷亡遂即分路進攻自初十日該夷敗潰後四竄奔逃墜巖落澗者不計其數立將何甬沈巢穴攻燬我軍進剿長馬嘶河其附近之獼猴又別租支呢伊支勒摩支望風驚懼陸續請營乞降何甬沈之餘黨呼噠老二白母子二夷酋退踞老巢我軍四面圍攻該夷突出悍匪數百人拒敵經前哨由右迎擊左營由左包抄鏖戰逾時斃傷兇夷數十人各隊奮力齊進立將堅堡攻開擒獲生夷五名斬首十一顆收獲巨礮兩尊夥夥衫日餘件呼噠老二等遠竄老林伏匿十五日乘勝進擊直抵西河沿河蠻堡平燬三座蠻棚連燬十二處奪獲軍械二百餘件割取首級四十七顆生擒悍夷十二名立予軍前正法我軍陣亡勇丁陳福勝等六名受傷楊永清等十八名二十二日進軍至石碣

山後突出夷匪二百餘人當與接仗鎗礮齊發該夷奔潰擒獲著名兇夷力曲挖黑二名當卽島首我軍遂於八月四日撥隊進駐於馬勒子等處何市沈之親支特茲夷巢避居山下我軍又分三路圍攻陣斬夷娃十三名直入其巢焚燬蠻棚殆盡其附近之嚙拔鐵花扯牛拉馬挖耳且噠各支相率來營乞降九月初五日我軍旋赴大興塢所竊西水池馬家三支及糯米七支銀罐竊吸呼各一支亦同日來營乞降並請將伊噠老二白母子二夷首從寬准其就撫願將搶去之羊牛糧食人口悉數清還該鎮府查該夷曾伊噠老二等雖係何市沈句串之餘黨年來尙無搶殺漢民案據姑准貸其一死以遂衆夷之求仍將其解郡寄禁夷堡察看數年如能悛悔再爲上班當差斯時西昌各夷一律就撫惟三拔橋一帶火山五支鄂馬兩支尙存觀望因移師茨達河示以兵威該夷遂將兇夷沙驪子邱模子二名解營正法四境肅清別無可發之支各營陸續收隊回郡定於十一月初二日齊集數十夷支在於郡城之校場大開牛皮箭不復反等情由該鎮府先後稟報前來除飭將營後事宜妥爲辦理外伏查該鎮府所屬數十夷支年來騷擾不靖皆由夷酋何市沈等句串所致該鎮府主先剿後撫之議先後募勇二營並調制兵中左兩營暨土司率同土兵土練隨時剿撫未及半載一律肅清辦理尙屬妥速不無微勞足錄所有此次會辦之建昌鎮總兵劉士奇等應請 勅部從優議敘 上諭劉秉璋奏剿辦建昌鎮屬夷支完竣請將出力

員弁獎勵一摺四川建昌鎮屬夷酋何市沈等於上年夏秋間滋擾經總兵劉士奇等調募營勇剿撫兼施現已一律肅清辦理尙爲妥速所有在事出力之建昌鎮總兵劉士奇著交部從優議敘寧遠府知府唐承烈著俟歸道班後賞給二品頂戴記名提督留川候補副將周得勝著賞給強勇巴圖魯名號千總馬步雲著免補千總以守備留於四川儘先補用並加都司銜廩生夏著勳著以訓導不論雙單月歸本班先卽選文童開榮第著以巡檢不論雙單月卽選五品軍功譚鶴鳴著以千總儘先補用知縣劉松年著俟補缺後以直隸州知州用餘著照所議辦理另片奏請將前保知縣之穆秉文仍照原保給獎並大吏使穆秉文著准其免補本班以知縣留於四川補用以示鼓勵該部知道單併發○薛福成奏臣於光緒十九年七月謹陳滇緬分界大概情形並聲明界務將竣續議商務惟騰越八關界址未清尙須理諭等情在案臣前與英廷訂明將久淪於緬之漢龍天馬兩關歸還中國秋冬之間仔細考察始知鐵壁虎踞二關亦早被英兵占據幸鐵壁關距邊密邇臣屢向英外部爭論彼始允令英兵卻退數里鐵壁關址以庫弄河爲界惟虎踞關界限方向初甚渺茫久無定論乃電請雪貴督臣王文韶派員查勘邀同八募英官腹勘英官並無異辭印度總督則謂該關深入彼境七八十里已與八募相近且鐵壁關已百餘年一旦棄之有損顏面其意難於割地遂并新於讓關臣又聞印度總督以外部允讓野人山內普馬等地意甚

不平聽信武員邪說屢思翻異又欲借端停商全約停商之後彼知中國界址未定漫無限制仍可伺機進占再閱數年非特昔馬等地可以不讓即界綫亦可如彼意重定觀於前使臣曾紀澤商辦之時迄今事隔八年再與議約難易損益相去倍蓰其明證也臣再四思維決機宜速不宜遲防患宜速不宜遲固不值以一隅而妨全局亦未便爭小利而墮詭謀度勢揆情剛柔互用在虎踞關以東劃定界綫雖未能復百餘年前割地較之消邊所守新界似已稍有展拓此界務已定之大略也臣查商務辦法以曾紀澤原議二端為綱領一曰大金沙江行船一曰八募立準設關彼族以停議既久堅不承認竊思大金沙江為滇邊外絕大尾閭兵商輪船暢行無阻夫名山大川國家之寶苟有機會當以全力圖之河西遼陽邊隅宜有通海便捷之道局勢方為靈活臣特將行船一事設法磋商外部始終支宕以慮他國援照為辭繼與商於約中另立一條聲明此係滇緬交涉之事他國不得援例彼始勉強答允惟於八募設關處之尤切拒之尤堅經臣再三開導告以立約試辦乃亦勉強答允詎全約甫經訂定印度總督仍堅持利權不允設關意在乘機要挾實報過奢臣思設關能否大獲利益尙未可知該督所索則萬不能允且既違其意尤恐被其掣肘不能獲益臣於是籲貴外部無自主之權竟將八募設關一條刪去亦撤約中英人所得權利如緬鹽不准運入滇境英關暫不徵收貨稅領事係設一員并限制其駐紮之地商貨僅由

二路并化去其開埠之名外部頗形自慰不甚爭論此商務已定之大略也竊維中國地大物博數十年間東西洋各國立約通商船艦則行我江海租界則踞我口岸教士流氓紛至沓來領事臬司擅勢自恣或奪我商民之利或撓我官吏之權或違我教化之經或窺我寶藏之富事端百出防範難周 朝廷所以不輕允開商埠者職此之由惟自英人覬取緬甸以來雲南三面與彼毗連我所宜急彼所欲緩者莫如分界彼所素急我所稍緩者莫如通商曾紀澤前與議定俟分界後方能通商蓋寓相維相制之意邇年英兵騷擾邊境不得不催英廷分界懸仗 聖主威福並承總理衙門指示俾臣相機妥籌悉心商辦西面則稍拓野人山內昔馬等地暨收回緬壁天馬等關南面則稍拓宛頂邊外之地潞江以東科干之地暨收回車里孟連兩上司全極邊國既安覬覦漸戢但英人按照緬約第三款僅議商務刻不容緩今者八募設關一事雖未就範然因彼既允復翻我得收回別項權利似於防弊去損之道不無關係加以大金沙江行船乘便利於境外播聲勢於實中似稍足變趨規而張國體茲合界務商務約款共二十條臣擬與英外部大臣勞俾伯力克日先將草約齎諾以杜狡變一面彌送總理衙門俟奏明 批准後即可換約開辦得 旨著照所議辦理○云辰 上請 大高殿 壽皇殿行禮○諭軍機大臣等內務府奏稽查庫役參款一摺據解補舒明捐納各案吏部咨撥冊內有董舒明捐輸請獎戶部覆稱捐名係舒

明無董字該員各捐冊內並未彙敘已革庫役等語其因何冊名歧異並有無據指情弊著吏部再行確查據實覆奏○諭熙敬昨日具奏謝恩未用黃摺殊屬非是熙敬著交部議處○諭吏部等衙門會奏遵議處分一摺總管內務府大臣大學士福錕鑲黃旗蒙古都統容貴吏部右侍郎崇光戶部右侍郎立山兵部左侍郎巴克坦布應得降二級留任處分均著不准抵銷嗣後該大臣等務須督飭司員將常年用款核實攤節開支毋令任意糜費致干咎戾○諭前據御史蔣式芬奏參順天府府尹孫楫懶見僚屬玩視民瘼各情當諭令麟書薛允升確查具奏茲據麟書等奏稱孫楫於調署各缺尙無別情所參各節查無確據等語孫楫因懶見僚屬被人奏參著開缺另候簡用順天府府尹著陳彝補授○癸巳 上詣慈福端佑康頤昭豫莊誠壽恭欽獻皇太后前請安○諭本年恭逢 慈福端佑康頤昭豫莊誠壽恭欽獻皇太后大旬萬壽寶字臚歡薄海臣民咸深慶抃外省將軍督撫都統提鎮藩臬等官自必情殷瞻覲籲懇祝綏因念各省文武大吏職掌綦重若同時並赴恐地方勞伍事務管理乏人或貽誤轉非敬事抒忱之意朕欽奉 慈旨於各省將軍副都統提鎮藩臬內每省各酌派二三員均於十月初一日以前到京並各酌帶道府丞倅將備二三人隨同班列其未派令來京者毋庸紛紛籲請庶各省文武官員於本任職司要務不虞曠廢欽此將此通諭知之○乙未諭軍機大臣等本日據德馨奏遵有查傳編修饒

士騰業已先期赴京一摺著翰林院飭查該編修何日到京卽行歸案研訊原摺著鈔給閱看將此各諭令知之○諭本日召見理藩院尙書松霖詢以該衙門有無熟諳英文人員該尙書奏對未能明晰松霖著交部議處此次具奏事件該尙書何以又未呈遞牌著明白回奏○諭朕欽奉 慈禧端佑康頤昭豫莊誠壽恭欽獻崇熙太后懿旨本年予六月慶辰各省文武大員情殷祝嘏業經降旨於各省將軍督撫副都統提鎮藩臬內每省各酌派二三元來京慶祝著派盛京禮部侍郎文興副都統繼祿吉林副都統阿克都林扎布黑龍江副都統文全直隸總督李鴻章察哈爾副都統吉陞阿寶慶副都統國俊直隸提督葉志超江甯將軍豐紳漚運總督松椿江甯布政使瑞璋江蘇按察使陳浚安徽壽春鎮總兵任祖文布政使德壽青州副都統訥欽山東布政使湯聘珍綏遠城將軍克蒙額山西按察使張汝梅河南巡撫裕寬河北鎮總兵劉盛休西安將軍榮祿陝西布政使張岳年甯夏副都統蘇麟岱甘肅按察使裕祥喀什噶爾提督趙福祥杭州將軍吉和浙江提督馮南斌布政使趙舒翹福建將軍希元福建按察使張國正江西布政使方汝翼荊州將軍祥亨四川松潘鎮總兵陳金鰲雲南布政使史念祖貴州按察使唐樹霖湖北提督吳鳳桂布政使王之春湖南布政使何樞放州將軍繼格廣東巡撫剛毅廣西按察使胡燏棻等著於十月初一日以前到京恭候屆期隨同祝嘏其未經派出各員毋庸再行籲請○內中徐樹鈞

奏恭照元旦令節舉行太和殿筵宴特啓 恩施嘉興廷臣同飲景福承辦各衙門理應敬謹將事以免
愆儀乃是日丹墀下宴桌皆設於青幕之外顯與通禮所載不符且鴻臚寺理藩院官亦不分引三品以
下與宴各官及朝鮮使臣排班就位行禮位次混淆已覺草率且丹墀與宴各官暨外國使臣皆未入宴
閒雜人等紛紜擾攘任意攪取執事員役仍蹈前轍 朝廷典禮何以尊重合無仰懇 天恩諭令臚司
筵宴各衙門認真整頓彈壓遵照禮部奏定禮儀格恭將事庶幾鉅典可尊 朝綱可肅 上諭給事中
徐樹鈞奏筵宴禮儀不肅請飭整頓一摺殿廷筵宴典禮攸關承辦各衙門應如何恪恭將事若如該給
事中所奏殊屬不成事體嗣後筵宴事宜務當認真整頓妥為彈壓遵照禮部奏定禮節敬謹辦理如有
草率紛擾情事卽著該管大臣據實參辦以重典禮○丁酉許振祿奏 臣以罪材未諳河務蒙 皇上天
恩使治東河受 命數年日夜祇懼去冬復膺 寵命召 臣會勘永定河工感激驚惶罔知所措蒙 恩
召對二次 指示機宜 聖慈高厚碎首難酬而御史高燾曾疑 臣氣餒便涉支離此皆實難之辭一意
爲公顧 臣目所未經何敢臆說給事中洪良品條陳數端 臣不逮此亦關心時局恐涉迂疏而與 臣集
思廣益之心適相符合 臣惟治病必明其受病之處除弊必審其積弊之由而後方可得而施效可漸而
獲凡事類然未聞愆劣觀之論說而不爲採取者也既知受病當籌去病之方既知積弊當思去弊之實

勢不容緩亦未聞遇人事之難爲而遂可推卸者也今永定河以無定之形出至險之工本淤墊之深窮疏濬之計幾於歲歲有患防不勝防 聖主焦勞於上臣工竭蹶於下災黎何堪籌賑將竭 臣觀督臣李鴻章勞思研度其惶急有百倍於諸臣者特實無一勞永逸之計耳即 臣奉 命會勘黃河與永定形固不同而補救與修防理無二致此督 臣不能不任其艱難微 臣不能不竭其所愚者也 臣於 陛辭後即馳至天津與督 臣會商當同感荷 聖恩互相激厲奮殫竭愚仰酬 高厚凡 臣所隨地隨時密爲採訪紳民僚屬多所周諮有可以補助補苴者督 臣皆以先事籌之意見相同因遂定計昔人謂宋人議禮如聚訟 臣觀近人論治河亦如聚訟何也立彌河愚列聖言之詳矣當時 高宗純皇帝不惜帑項累載經營而又 六飛巡幸逐處研求亦知數十年後殊乏良策顧 聖人謙讓之成模即後世遵循之良法今欲救弊補偏稍擇大患者不仿照 先型而謂可別出巧便以濟事者亦未之前聞也 臣與督 臣熟商其最著成效安瀾八年者莫如道光四年一案當時各口漫決水患頻仍 宣宗成皇帝特命河 臣張文浩侍郎程含章與督 臣蔣攸銛會勘估議建設閘壩挑掘成河以分盛漲御史陳澧累疏相爭指爲有害宣廟卒從程含章蔣攸銛之議修復金門石閘又新建灰壩而後迭慶安瀾即經道光年間偶有漫溢水卽由減水引河歸槽於民田房屋不其衝害此前事之可師也今事歷四十年閘壩湮阻水無所分以致

河壩愈高鉅險四出此病在中洪又下游海河淤塞近自通商開埠以來兩岸均有洋商修築碼頭河身東窄宣洩不及此病在海河又立壩諸水會入三岔河者有大而永定居中其下口不能自爲一路不入鳳河卽入清河既恐入鳳河而礙清勢必藉清河爲下口清渾合流兩相頂托下壩上壩旁溢時虞此病在下口至於永定河工修防之弊亦皆有由臣再四密查尙不至爲從前黃河浮冒侵漁特苦於無錢不能辦公耳前督臣曾國藩疏稱領款徒存其名修工則無其事此切中河員情弊故曾國藩亦力請加撥銀兩查永定河歲定額款九萬四千餘兩此在道光年間河務修理自可足用今自咸豐年間軍事日艱部款難辦或撥四分之一或撥四分之一至曾國藩所請撥至四分之三李鴻章所請始能足復全額而河工之廢弛已深且同治九年以前兩岸歲防之料只辦三百餘垛今則加辦至一千三百餘垛而善後所增之數百垛卽與專在常年鎮堵禦溜尙且不敷何暇顧及挑疏此積弊之由人所共見而非加款則不能整理者臣與督臣查實病弊因籌補救之方約有五端敬爲我皇上陳之一曰疏下游查下游至今日誠難施工然未有既知其難遂不爲之之理顧實非一鼓可成亦非估工能定第年年爲之自有裨益此事應歸督臣專辦或以工代賑或派兵夫幫助先其所急時爲之潛不責成效而隱有成效矣一曰保近險查險工以南上爲最而北下次之南上汛工縣長十七里大溜緊逼堤根尋常大溜衝逼亦恐

難守然黃河保險全恃埽段護埽之需非料莫濟合無仰懇 皇上天恩勅下部臣每年於額款之外加撥銀四萬兩庶幾防守有資而後可冀驅汎功罪否則大險當前束手無策加數萬之費或能保守豈不愈於堵合賑救之數十萬金乎臣粗有所見理合直陳非敢偏護於工員也一日疏中洪查永定河上下二百數十餘里中洪悉爲沙淤高與堤平若一律挑浚非千數百萬不辦然河流非處處皆險今但就危險之處挑掘中洪裁灣取直使水不至逼衝堤根而加埽護堤自可拍救此工但冀驅汎可隨時隨地爲之第每年加款四萬金而積料與疏治近險之中洪在其中矣一日建減壩臣未抵京以前督臣已飭司道定議於蘆溝橋上半里南岸建減水大石壩一座可減水而不奪溜爲釜底抽薪之計此實仿照成規行之決定有益舍之更自無法必當就大汛以前飛速趕成爲是一日治上游臣觀督臣減壩之策亦無非統籌大勢參稽成憲恐永定河受病太深蘆溝一壩尙慮力量難勝如道光四年既建灰壩復修金門石閘兩工並舉水始分洩河患遂爾稍紓頃有議蘆溝橋以上建瓚奔駛勢發太驟必當分設滾水壩東西斜峙以殺水之怒者復開渠引河以洩水之漲者則水道曲折紆緩不至橫溢直趨乾隆九年總河高斌曾於懷來縣境諸水匯流處修築石壩有案今應相度形勢距蘆溝以上百餘里擇地建壩最爲得力此爲衆流所趨入渾河之首有兩山以約束中流闊約百餘丈水淺易淤設壩上游得分水之法則下游

有容蓄之助加以蘆溝大壩河溜已洩數分而後南上北下之險工可用埽段防禦其言不爲無見臣擬親馳該處相度再商督臣籌辦頃據司道會估蘆溝減水壩實需銀二十六萬七千四百餘兩今臣又擬於上游添壩當亦不減十餘萬兩合無仰乞 天恩飭下部臣速撥三十萬兩以應督臣急工其餘不敷銀兩再由督臣於賑捐欸內提用以救民之事動濟急之欸應蒙 聖慈俯允惟是河工以得人爲先得人究非容易臣訪聞直隸之精諳河務者莫如臬司周馥而大順廣道吳廷斌次之周馥愛惜公欸少徇情面爲受怨之所由來今欲整頓河務臣已會商督臣調派該二員前來助理以資熟手臣觀近來奔競之徒往往視河工爲利藪臣此次會勘河務誓不薦引一人以後河員失舉議罰不可太輕河工合龍列保不可太多事核實積弊當除臣與督臣再四籌思如道光四年之整理閘壩著有成效者由遵行高宗純皇帝成法今若我 皇上俯允於上游添建兩壩是亦如道光年間修復金門關灰壩之舉本法祖之盛心行補救之實政百靈效順或可仰託 聖主洪福遂有轉機臣等廷懃懃悚此外實苦無策臣於月之十一日商同督臣會勘全河適督臣公務叢雜擬略緩前往而上游建壩甚多一切待臣勘視因商督臣不必同行而委臬司周馥隨臣會勘仍隨事往返商下游疏濬卽由督臣就近斟酌次第施行臣徧歷堤岸益知擬辦之工以早爲貴臣催臬司周馥尅日興工臣卽暫駐工次俟減壩稍有頭

繕再與周馥同勘上游或籌再添一二壩先將商辦大概情形請會同大學士直隸總督臣李鴻章恭摺
馳陳冀以上紆宸廑伏求 皇上聖鑒訓示遵行 上諭許振祿奏遵旨會勘永定河上下游大概情
形籌商辦法一摺所擬疏下游保近險疏中洪建減壩治上游各條均屬妥協即著會同李鴻章分別籌
辦並准其每年添撥歲修銀四萬兩以資防守所請於蘆溝南岸建築減水石壩需用經費著戶部即撥
銀三十萬兩迅速解往應用該河督擬請再於蘆溝以上擇地築壩以分水勢即著親往履勘核實估計
工需再行奏明辦理餘依議該部知道○己亥諭前因御史烏爾慶額奏參內務府已革庫役董舒明改
名捐納道員當經飭令內務府確查嗣據復奏內稱董舒明捐納各案吏部咨覆冊內有董舒明捐輸請
獎戶部覆稱捐名係舒明無董字該員各捐冊內並未聲敘係已革庫役等語復諭令戶部吏部將因何
冊名歧異並有無朦混情弊再行確查茲據該部查明覆奏又據內務府據實檢舉自請議處並請將繕
摺誤書董字之司員一併議處各一摺此案舒明即董舒明報捐道員時未將已革原案先行捐復徑由
監生報捐註冊時並未聲敘被革原案實屬隱匿朦混著將所捐雙月道員及花翎二品頂戴暨從二品
從一品各封典一併斥革撤銷其奉行出具圖結之內務府正白旗漢軍管領鍾吉著交部照例議處內
務府前次覆奏時未將舒明朦混情弊查出實屬疏漏總管內務府大臣均著交部議處至繕摺錯誤之

承辦司員一併交部議處○諭陶模奏上年十一月間庫車縣迭次地震城署民房坍塌損並傷斃人口多名業經委員勘驗散給銀糧分別撫恤等語覽奏殊堪憫惻卽著該撫督飭委員會同地方官認真辦理毋任一夫失所用副朝廷軫恤災黎至意○王文韶等奏臣等前因越南游匪竄擾邊界當派兵勦辦情形於九月十二日專摺奏報欽奉 硃批知道了卽著督飭派出員弁迅速勦辦毋任蔓延欽此當卽嚴飭各營遵照在案署臨元鎮總兵馬維騷於九月初六日由蒙自開隊初十日抵都竜布隘一切二十日進漫美查得漫美前四十里爲光山山右十里爲五棵樹山左十里爲南登河河南卽黃樹皮背倚大山路徑叢雜賊於山脊紮大礮樓一座四角輔以礮樓山腰亦紮營壘數座棋布星羅意圖久踞二二三三日馬維騷派定各營四面進逼相距賊營均祇四五里二十四日夜間該匪乘我軍新壘初成分三路來攻馬維騷傳令各營憑壕固守相持至二十五日天明都司白金桂突起開營出隊迎擊奮力攻撲鎗礮齊施匪黨敗退擊斃悍匪數十名奪獲義矛四十餘件我兵帶傷四名先是黃樹皮匪黨與安規大牛之匪聲息相通欲規復黃樹皮非先將附近賊蹤掃淨不能著力遂派副將李正昌懷遠前營管帶周天長由菁門右路傍黑河紮營以牽制賊勢懷遠左營管帶熊學文哨弁黃文光由左攻取漫瓜寨以截賊匪歸路十月二十日卽將漫瓜攻克各路營壘紮營二十六日把總項筱嵐帶隊攻其南遊擊劉秀

和都司鼎學文攻其東南參將馬遇龍遊擊郭先陽等攻其西北並派哨弁王錫恩帶開花礮隊相機進擊自二十七日黎明開仗各路齊進匪黨亦分路抵距鏖戰至申酉間賊皆退伏地營不出急切難下相持兩晝夜各營連環攻擊皆未收隊開花礮子聯絡不絕二十九日卯刻賊勢不支始棄壘外竄我兵乘勢追擊斬賊無算敗賊鬼水渡河分股向安規大牛一帶逃遁其附近礮樓之匪猶復死守不退各軍見黃樹皮賊壘已克勇氣百倍喊聲震地連破賊營十餘座陣斬首級二十餘顆擊斃匪黨甚多我軍傷亡十三名當將黃樹皮踞匪一律掃蕩遂飭各營沿河築壘防守此馬維祺全軍自九月二十至二十八等日迭獲勝仗及十月二十九日攻克黃樹皮賊營之實在情形也知州黃忠勳由省兼程馳抵開化以後路都章地方爲紅綫界內第一關鍵外爲黃樹皮運道內爲白馬關門戶關係最爲緊要卽於九月初八日帶領綏遠營馳抵都章商請馬維祺率領大隊赴黃樹皮督戰自任留守都章該匪因前敵營壘既成圍援後路以解黃樹皮之圍遂於十月初八夜率黨五六百人由扒龍渡河圍攻小壩子查小壩子北距白馬關西距仁和東距都章均只半日程當飛調出紮舊門之哨弁彭紫瑞鄧人濬連夜折回馬維祺得報亦卽抽調都司白金柱帶隊馳援都章等得報電飭署開化鎮何雄輝添募勇丁一哨出駐白馬以防內犯另派省防參將黃呈祥管帶綏靖中營副將彭惠俊管帶綏靖副中營兼程前往策應以厚兵力

十二晚賊分三路來撲都章經哨弁彭紫瑞鄧人溶擊退十四日黎明賊黨大股擁至將黃忠勳三疊圍住都司俞飛熊守備廖興仁中砲陣亡幸白金柱趕到合力固守其時賊勢猖獗左哨一疊已被攻破弁兵陣亡三十五名帶傷二十一名賊復猛撲中壘勢甚危急經曰金柱拚死抵禦派隊繞出賊後將後山之賊擊敗賊始稍卻是夜白金柱約同彭紫瑞帶番勇弁兵肉薄先登當將左哨營壘克復斃賊五六十名斬首十二級奪回大砲二尊賊始由茅坪等處渡河敗逃管帶綏遠營黃忠勳未能得力因卽撤退委都司白金柱接帶易名鎮遠營並添調臨平後營副將張士春前來協同防守綏靖兩營管帶黃呈祥彭惠俊亦先後到防彭惠俊分軍助守都章黃呈祥分軍扼守仁和廠適著開化鎮總兵張紹模業已接篆當飭馳抵白馬接辦防務俾何雄輝速回昭通鎮本任辦理各防此都章後路十月初八至十四等日被賊竄擾各營接仗解圍保全要地之實在情形也黃樹皮踞匪於十月二十九日敗渡黑河後盤踞界內尙有另股不時竄擾緣黑河沿邊二百餘里水淺處無賊其鴉口寨南莊街漫電飭竹棚小壩子等處仍有賊蹤往來佔踞焚掠當電飭馬維祺連將黃樹皮防務佈置嚴密一面抽調勁旅作為遊擊之師據派副將張士春參將馬如珍及哨弁宋智深王仁政戴朝倫等分爲三隊十一月初六日探有遊匪五百餘人分據鴉口南莊初七日經張士春約會白金柱分兩路抄出賊後同時追攻自寅至午匪勢不支向小

河順水敗去登將鴉口南莊等處賊營平毀斃賊三十餘名十一日復有遊匪三百餘人分竄都竜巖頭附近村寨燒殺經張士春帶同宋智深跟蹤追剿匪等又竄過小嶺子之右至永安塘南角拒紮其勢猖忽吳常經馬維祺於十七二十三等日調派白金柱由都竜分哨填紮鴉口等寨換出張士春馬如珍前往永安塘南角邀擊游匪又分股竄擾箇竹棚距小嶺子甚近意圖再犯都竜以致內地太麻仁和一帶民心俱甚驚惶經張紹模派黃呈祥分軍前往堵禦二十四日張士春會商彭惠俊等分三路圍攻箇竹棚賊營自率宋智深居左飭熊學文居右王仁政居中彭惠俊殿後轉戰而前陣斬悍匪多名賊勢漸卻退伏蘆茅中暗放鎗砲相持至午左隊士勇拚死直撲賊巢已近箇竹棚寨腳寨內衆賊分兩翼蜂擁殺出土勇卻退傷亡十餘人各營憤甚迺環進攻屢戰至二十六日寅刻匪黨鎗子打盡越壕奔竄我軍乘勢將箇竹棚賊壘攻破一面分兵追殺沿途斬獲無算直追至黑河邊界內已無賊蹤始各收隊此十一月初六至二十六日兩旬之間各營大小十餘戰迭克賊壘界內一律肅清之實在情形也臣等查羣賊如毛無所統率卒至悍然不顧依然抗拒官軍燒殺搶擄先踞黃樹皮旋竟覬覦都竜意圖大逞所賴總兵馬維祺督飭各軍分投剿辦後路都竜雖驚而前敵黃樹皮之圍堅持不撤力戰數日卒能掃蕩羣氛救民水火境內一律肅清論功以力保都竜爲最而規復黃樹皮次之蓋都竜有事非特前敵各軍餉

道隔絕卽沿邊內地亦將震動大局所關匪細也雖界外賊股紛如刻思復逞而成勢已著後患宜防謹
先擇尤酌擬獎勵並將死事各員弁懇 恩優卹以資策勵 上諭王文韶奏剿辦越南竄匪情形請將
在事各員弁分別獎勵一摺越南游匪竄擾邊境攻拱都章等處經官軍分投剿辦擒斬多名匪黨敗退
界內一律肅清辦理尙爲妥速著臨元鎮總兵馬維祺著交部從優議敘都司白金柱著免補都司以游
擊儘先補用並加副將銜賞給勝勇巴圖魯名號游擊劉秀和著免補游擊以參將留於雲南儘先補用
並賞給勳勇巴圖魯名號參將馬遇龍著仍以參將留於雲南儘先補用並加副將銜藍翎候選知縣李
炳南著免選本班以同知直隸州知州不論雙單月遇缺前儘先選用並賞換花翎以示鼓勵陣亡之都
司喻飛熊守備廖興仁恩騎尉楊謙把總雷祖元瘡故之補用副將李正昌把總彭紫瑞著交部分別從
優議恤仍著該督等督飭各營於沿邊地方嚴密防範毋任竄擾餘著照所請辦理○庚子諭本日召見
委散秩大臣興安奏對謝恩清語甚屬生疏經朕詢問據稱未曾學習清語興安著開去委散秩大臣回
旗讀書○諭禮部吏部會奏遵議御史安維峻條陳科場利弊禮部奏議覆給事中洪良品請嚴禁科
場傳遞各一摺所請給拿傳遞貢成出納官職認嚴禁士子紊亂場規及另遣書吏名冊送部各條均著
依議行科場防弊定例恭詳祇因奉行不力以致弊竇叢生自此次申明例禁之後著知貢舉監臨監試

各員懷遵諭旨實力整頓如有搶替傳遞及不遵場規喧譁亂號恃眾滋鬧情事著卽嚴拿懲辦不得稍涉寬縱倘再因循怠忽致有前項弊端一經發覺定將在事人員一併嚴懲毋謂誥戒之不豫也○辛丑諭前據給事中王會英奏參山東巡撫福潤縱吏竊民欺罔行私各節當經諭令李鴻章派員確查茲據查明覆奏前署利津縣知縣傅山縣知縣錢鏞將所收淤地租稅留於地方公用尙非懷利肥己所領運費銀兩亦無侵吞過結實據惟於汛官王國柱丈量淤地籠統招租收租未能詳查殊屬疏忽錢鏞著交部議處前署利津縣知縣候補知縣吳兆鏞催令災民遷徙遇事操切於地方被災之時開筵宴客實屬玩視民瘼外委王國柱聲名甚劣清丈淤地頗預草率不治輿情吳兆鏞王國柱均著一併革職巡撫福潤官聲尙好於沿河各屬遷民事宜盡心經營利津縣量地遷民並非該撫任內之事原參各節均查無確據應毋庸議餘著照所議辦理該部知道○壬寅諭三載考績爲國家激揚大典中外滿漢諸臣有能恪恭職守勞勩最著者允宜特加甄敘其平素衰病者亦難曲予優容茲當京察屆期吏部開單奏請朕詳加披閱禮親王世鐸大學士額勒和布大學士張之萬兵部尙書孫毓汶吏部左侍郎徐用儀胡燏棻廷璽心經畫和衷共濟悉協機宜均著交該衙門議敘大學士直隸總督李鴻章老成碩望重任克膺兩江總督劉坤一宣力有年勤勞懋著河東河道總督許振祿實心任事勞怨不辭均著交部議敘兵部尙

舊烏拉魯崇阿衰邁多病理藩院尙書松森禮部右侍郎景普理藩院左侍郎志顯才具平庸均著原品
休致理藩院右侍郎慶福才具稍短年力尙強著開缺以三品京堂候補餘著照舊供職○諭本月二十
五等日 慈寧宮舉行筵宴典禮攸關允宜倍加嚴肅承辦各衙門務當遵照禮部奏定儀節敬謹將事
二十五日著派御前大臣二十六日著派總管內務府大臣稽察彈壓不准閒人擅入執事人等如有到
班遲誤及草率紛擾情事卽著據實參辦以昭慎重○張聯桂奏近年哥老會匪隨地潛滋臣前奉 密
旨遵將廣西尙未傳染及粵地辦匪情形奏報在案本年秋間臣訪聞平樂府屬突有哥老會匪煽惑情
事不勝詫異密飭地方文武訪拿絕少端緒嗣經再三查察實有放票入會之人而匪跡未彰購捕不易
緩之既虞滋蔓急之恐生變端非幹練妥慎之員斷難得其要領查有副將梁効賢前在平郡多年緝捕
最為得力當卽飭委署理平樂協副將印務併管帶該郡防營授以機宜責成妥辦去後旋據該副將梁
効賢暨平樂府知府陳兆奎永安州知州鄧文淵先後稟稱州屬與荔浦修仁等縣連界之區有匪徒拜
會放票預圖滋事鄧文淵督率團甲密拿梁効賢陳兆奎各派親信潛投入會誘獲崇布盡得匪情知欲
約期起事梁効賢趕派把總鄒興才帶勇一哨馳往會同鄧文淵密辦該匪傳佈流言民心極其惶惑旬
日之間紛紛遷避八月二十日鄧文淵探悉匪目覃因詳在家密約代防城守營把總何元新更目補錦

池親率兵役前往圍拿該匪軍因詳接仗拒捕致傷親兵二名鄧文淵等督飭兵役上前立將該匪擒獲並在該匪家內搜出偽書一本內載堂名口號陣圖及洋鎗烏鎗叉矛等件並扒城木梯多具提訊該匪究出匪目莫溢山陳金萬住處分派兵役馳捕一併拿獲其時匪首蔣海標業已聞風先遁鄧文淵一面出示曉諭解散從一面安撫居民凡有愚民無知誤領票布者准令出首呈繳銷燬以安反側梁効賢陳兆奎又加派守備蔡龍光帶勇一哨奔赴巡防並購眼線跟追至永福鹿寨地方於九月初十日將蔣海標弋獲起出隨身票布印板一塊解回州城鄧文淵提同各犯質訊解由平樂府覆審錄供呈送前來臣詳核各供蔣海標係湖南零陵縣人先有貴州人全若賓給與票布屬遇同會彼此相幫全若賓旋即身故蔣海標本年五月間到永安州地方因資用缺乏起意放票斂錢從前曾學刻字手藝做照全若賓所給票布式樣潛刻天台金龍山名目印板用布刷印多張自立正龍頭隨邀得永安州人覃因詳為副龍頭莫溢山為新副陳金萬為第三排當家賣肉龍林續廷為新副名目均在坐堂陪堂之上陸續散過票布三百餘張有堂名口號陣圖偽書一本交覃因詳收存因人數已多起意約期起事置有鎗械等件聞知巡防嚴拏緊要無從動手旋因事洩潛逃至永福縣鹿寨地方被獲等供並據覃因詳莫溢山陳金萬各供均屬相同經臣批飭再三研鞫矢口如一查前奉行新章嗣後拿獲會匪訊係為首開堂放票及

領票轉糾或名目較大訊明就地正法爲首示衆地方文武舉獲著名首要隨案奏請優獎等因在案此案將海標開堂放票單因詳獎益山陳金萬名目均在坐堂陪堂之上輾轉糾夥至三百餘人約期起事均屬罪不容誅未便稍稽顯戮經臣批飭將該犯等在平樂郡城處決傳首永安州懸杆示衆以昭炯戒其餘無知愚民誤領票布經永安州剴切曉諭紛紛赴案呈繳應請從寬免究仍飭嚴拏逸犯貨肉籠等務獲究報票布板片銷燬地方安靜如常伏查此次哥老會匪流入永安州境糾夥欲圖滋事若非迅速拏辦一旦乘機勢起必至滋蔓難圖該文武等多方偵察盡力購捕先後將著名首要擒獲解散務從誤領票布者陸續查繳使地方消患未萌不致燎原難撲實屬辦理妥速著有勛勞仰懇 天恩俯准按照部章從優給獎出自 逾格鴻慈此外出力稍次員弁由臣查明酌給外獎不敢稍涉冒濫 上諭張聯桂奏拿獲哥老會匪訊明懲辦請將出力員弁獎勵一摺廣西平樂府屬上年秋間哥老會匪將海標開堂放票糾合匪黨因祥等約期起事經張聯桂飭令副將梁効賢會同知府陳兆奎等督率汛練前後密拿當將首要各犯拿獲正法務從解散地方安靖辦理尙爲妥速所有在事出力之副將梁効賢著以總兵交軍機處記名遇缺請旨簡放平樂府知府陳兆奎著在任以道員補用永安州知州鄧文淵著在任以同知直隸州知州前先補用永安州吏目蒲錦池著在任以府經歷縣丞候補守備蔡龍光著以都

司仍留撫標儘先補用彭滿汎千總陳建勳千總梁文允均著以守備儘先補用把總傅興才著以千總儘先拔補外委何元弼著以把總儘先拔補以示鼓勵仍著該撫飭令將升嚴拿逸犯與肉籠等務獲究辦并留餘馭餘著照所議辦理該部知道○追予前安徽壽春鎮總兵陳國瑞附祀僧格林沁祠○駐英欽差大臣薛福成與英外部大臣勞德伯力續議續條約二十款成其文曰 大清國 大皇帝大英國大君主五印度太后帝現因兩國如此和好極願固結鄰交益加親睦訂立條約俾光緒十二年六月二十三日北京所定續約第三款之事得以辦妥 大清國 大皇帝特派欽差駐紮英京大臣二品頂戴都察院左副都御史薛太英國大君主五印度太后帝特派欽差管理外部事務大臣勳賜極尊譯帶寶星世襲伯爵勞各將欽奉全權文憑互相較閱均屬妥協議定條款如左 第一款 一今議定兩國邊界自北緯二十五度三十五分起由格林尼址東經九十八度十四分即北京西經十八度十六分之尖高山起隨山脊而行向西南過高崙坪及瓦崙山尖山此過華昌村與高崙村之中間以華昌村歸緬甸高崙村歸中國直至薩伯坪 自薩伯坪起其綫向西而行稍向南過式脫崙坪到納門格坪由此仍向西南隨山脊而行至大薩爾河自此河源至此河與南太白江相會處分尤克村在東列格村在西自大薩爾河與南太白江相會處起界綫湖南太白江而行至此江與雷格拉江相會循雷格拉江上至

其源在尼克蘭相近自雷格拉江發源處分尼克蘭古庚拜格拉在西普馬及美利在東其綫自來色江之西源起至此江與美利江相會處復溯美利江上至其源在赫谷辣希岡相近再向西南順列塞江而行自列塞江源至該江流入穆雷江處在克同相近分克同村在西列塞村在東界綫即循穆雷江向東南而行至與既陽江相會處然後溯既陽江上至其源在愛路坪然後由南奔江西支源起順南奔江而行至流入太平江之處以上係首段之邊界綫 第二款 一第二段之邊界由庫弄河與太平江相會處起循庫弄河經過其西邊一條之又江至其根源自此向南而行與洗帕河相會適在漢釐之西南以麻湯歸英國壘弄格東鐵壁關漢釐歸中國至此溯洗帕河之支江而上此江有根源最近孟定格江之根源即循山脊而行向東南方至南碗河邊靠南之克沱以克沱歸中國配倫歸英國循南碗河向西南方而行下至該河轉向東南處約在北緯二十三度五十五分其綫由此往南稍向西至南莫江以南蓋歸英國循南莫江而行至南莫江分開處約在北緯二十三度四十七分溯南邊一條之支江而行至蠻秀南邊高嶺之脊約在北緯二十三度四十五分即循此嶺脊而行此嶺脊係向東行稍向北至瑞麗江與南莫江相會處以蠻秀地方及天馬關欣隆拱卯各村歸中國此數處在以上高嶺之北首即溯瑞麗江而上至此江分流處再溯南邊一條之支江而上以江中大洲歸中國至此江與孟卯相對東邊合流

相近之處如第三條所開 中國答允由八募至南坎各路中之最捷一條大路經南碗河之南中國一小段地內除中國商民與土人仍舊任意行走外亦可聽英國辦事官員及商民游歷之人行走並不阻止英國如欲修理此路或設法改築可稟平穩告知中國官後便可動工辦理又有須保護商賈或防偷漏等事英國亦可籌備辦理又議定英國之兵可以隨便經過此路但如兵數過二百名者若未經中國官答允即不准過此路所有帶軍器之兵如在二十名以上即須預先行文知照中國 第三款 第一段之邊界自瑞麗江與孟卯相對東邊合流相近之處起照天然界限及本地情形東南向麻栗壩而行約到格林尼址東經九十八度零七分北京西經十八度二十三分北緯二十三度五十二分地方有一大山嶺自此循嶺脊而行過來邦及來本隴至薩爾溫江約在北緯二十三度四十一分此段由瑞麗江至薩爾溫江之邊界應照第六條所開由勘界官劃定所有歸與中國之地極少須與孟卯至麻栗壩作一直綫爲邊界所包括之地相等倘查得合式可爲邊界之處尙須加添少許之地歸中國則中國應將別處邊界之地給還少許與英國此事俟日後酌辦可也 自北緯二十三度四十一分起邊界綫循薩爾溫江至工隆北首之邊界即循此工隆邊界向東留出工隆全地及工隆渡歸英國科干歸中國由此循英國所屬之玳麥與中國所屬之孟定分界處之江而行仍隨此兩地土人所熟識之界綫至界綫

離此江登山處以薩爾溫江及湄江之支流水分流處爲界綫約自格林尼址東經九十九度北京西經十七度三十分北緯二十三度二十分約至格林尼址東經九十九度四十分北京西經十六度五十分北緯二十三度將耿馬猛董猛角歸中國在格林尼址東經九十九度四十分北京西經十六度五十分北緯二十三度處邊界綫卽上一高山嶺此山名公明山循山嶺向南而行約至格林尼址東經九十九度三十分北京西經十七度北緯二十二度三十分以鎮邊關地方歸中國然後其綫由山之西斜坡而下至南卡江卽順南卡江而行約過緯度十分之路以孟連歸中國孟崙歸英國然後循孟連與康東之界綫此界綫亦皆土人所熟悉至北緯二十二度稍北處卽離開南卡江向東略南循山脊而行至南疊江約在北緯二十一度四十五分格林尼址東經一百度北京西經十六度三十分由此循康東及江洪之界綫此界綫大半係順南疊江而行惟除屬江洪一小帶之地係在南疊江之西北緯二十一度四十五分稍南界綫行至江場邊界後約在北緯二十一度二十七分格林尼址東經一百度十二分北京西經十六度十八分卽循江場與江洪之界綫而至湄江 第四款 一今議定北緯二十五度三十五分之北一段邊界俟將來查明該處情形稍詳兩國再定界綫 第五款 一現因中國不再索問永昌騰越邊界外之隙地英國大君主於北丹尼地及料干照以上所劃邊界讓與中國之外又允將從前屬中

國兼屬緬甸之孟連江洪所有緬甸上邦之權均歸中國 大皇帝永遠管理英國大君后於該地所有權利一切退還惟訂明一事若未經 大皇帝與大君后預先議定中國必不將孟連與江洪之全地或片土讓與別國 第六款 一約內所開邊界各綫及所附之地圖繪明詳細應由兩國所派勘界官比較劃定以免地方官民爭論如查得無論何處有未甚妥洽者應行更正兩國勘界官應於交換批准條約之後十二箇月之內在兩國屆時所定之地相會勘界官自首次相會之日起應限定不出三年之外將兩國界綫一律勘定倘兩國勘界官查出所定界綫必須改易其互易之地不應僅視其地面之大小須論地土之肥瘠及緊要與否倘勘界官不能商妥應速將未妥情形各報明本國國家核辦 勘界官又須設法查勘中國舊邊界名為漢龍關者倘查得在英國境內英國當審量可否歸還中國如查係在緬甸之北邊則已歸中國矣 第七款 一劃界之事經兩國勘界官勘定後兩國如有越界之兵寨等於八箇月之內一概退出彼國兵退此國立即派兵接駐兩國應將退兵駐兵日期豫相知照自駐兵之日起應各據保界內所居之各種野人安靜無事 除保護邊界各地安靜必應有之兵寨外兩國皆允各不在邊界十英里之內建修新礮臺營寨英里量法係從最近之邊界作一直綫量之 第八款 一英國極欲振興中緬陸路商務答允俟條約批准之日起以六年為期中國所出之貨及製造之物由早

道運入緬甸除鹽之外概不收稅英國製造之物及緬甸土產運出緬甸由旱道赴中國除米之外概不收稅其餘悉照第十條第十一條辦理以上鹽米之稅不得多於出入海口所收之稅 第九款 一凡貨由緬甸入中國或由中國赴緬甸過邊界之處准其由蠻允燕西兩路行走俟將來貿易興旺可以設立別處邊關時再當酌量添設中國欲令中緬商務興旺答允俟批准條約後以六年為期凡貨經以上所開之路運入中國者完稅照海關稅則減十分之三若貨由中國過此路運往緬甸者完稅照海關稅則減十分之四凡有陸路出入貨物應給發三聯單照通商口岸章程一律辦理 運貨經過中國地段如在此約所准之路之外反有偷漏等弊倘中國官願為查辦即可將該貨充公 第十款 一凡以下所開軍器非經國家准購不得由緬甸運入中國亦不得由中國運往緬甸此等貨物僅准售與奉 國家明諭購辦之人不得售與他人如各種鎗礮及實心彈開花礮大小彈子各種軍械軍火硝磺火藥炸藥及別種轟發之藥 第十一款 一食鹽不准由緬甸運入中國中國銅錢米豆五穀不准運往緬甸鴉片及酒不准由兩國邊界販運出入惟行路之人准其酌帶若干以備自用每人准帶之數應照關章定奪 若犯此條及前一條即將所有之貨充公 第十二款 一英國欲令兩國邊界商務興旺並使雲南及約內中國新得各地之礦務一律興旺答允中國運貨及運礦產之船隻由中國來或往中國去

任意在厄勒瓦諦江行走英國待中國之船如稅鈔及一切事例均與待英國船一律 第十三款 一
中國 大皇帝可派領事官一員駐紮緬甸仰光英國大君主可派領事官一員駐紮蠻九中國領事官
在緬甸英國領事官在中國彼此各享權利應與相待最優之國領事官所享權利相同如將來中緬商
務興旺兩國尚須添設領事官應由兩國互相商准派設其領事官駐紮緬甸之地須視貿易爲定 中
英兩國領事官在所駐之地與其地方大員往來均係平行 第十四款 一英國商民等欲由緬甸赴
中國應向合宜之英員請中國派駐仰光之領事官或邊界上之中國官給發護照方能前往其護照式
樣一邊英文一邊華文與通商口岸所給護照無異華民欲由中國赴緬甸如願領護照者可向華官請
英國駐紮蠻九之領事官給發護照倘過中國別地有一英國領事官亦可就近請給護照 第十五款
一英國之民有犯罪逃至中國地界者或中國之民有犯罪逃至英國地界者一經行文請交逃犯兩
國卽應設法搜索查有可信其爲罪犯之據交與索犯之官 行文請交逃犯之意係言無論兩國何官
祇要有官印便可行文請交此種請交逃犯之文書亦可行於罪犯逃往之地最近之邊界官 第十六
款 一今欲令兩國交涉與貿易日臻蕃盛並欲中國派駐仰光之領事官與中國大憲往來通電兩國
答允俟可設法通電之時應將兩國電綫接連此綫創辦之始專寄緬甸官商等往來電報 第十七款

一兩國人民無論英民在中國地界凡有一切應享權利現在所有或日後所添均與相待最優之國一律不得有異 第十八款 一約內所開通商各節俱非尋常款例此由兩國察看地方情形及中緬陸路通商應辦之舉互相允讓而立所有互給權利兩國之民除有同樣情形外不得在別處接壤之地照樣索問即使有同樣情形亦必須有同樣之允讓方可 第十九款 一以上通商章程係暫行試辦俟兩國察看詳細情形如何去礙獲益可於交換批准條約六年後或中國願行修改或英國願行修改均可商議倘兩國俱願略早商改亦可 第二十款 一此約由 大清國 大皇帝大英國大君主五印度太后帝批准俟畫押之日起准六箇月在倫敦互換或能略早亦可此條約應於交換後立即開辦現在 大清國大英國各大臣先蓋用關防以昭信守○癸卯以敬信爲兵部尙書崇禮爲理藩院尙書裕祿爲左都御史○以立山爲戶部左侍郎調克們泰爲戶部右侍郎以志銳爲禮部右侍郎榮惠爲兵部右侍郎溥良爲理藩院左侍郎會章爲理藩院右侍郎文琳署刑部右侍郎○允唐樹楠開缺以曾鈺爲陝西按察使○乙巳諭朕欽奉 慈禧端佑康頤昭豫莊誠壽恭欽獻皇太后懿旨榮壽固倫公主著賞食固倫公主雙俸惇勤親王奕諒之廢妾富佳氏著封爲惇勤親王側福晉順承郡王訥勒赫之生母楊佳氏著封爲順承郡王慶恩側福晉○以定昌爲正白旗漢軍副都統克們泰爲正紅旗滿洲副

都統英廉爲鑲紅旗漢軍副都統玉璽爲鑲藍旗蒙古副都統○丁未福銀等奏臣等承准軍機大臣字
寄光緒二十年正月十七日奉 上諭本日據德馨奏遵旨查傳編修饒士騰業已先期赴京一摺著輪
林院飭查該編修何日到京卽行歸案研訊原摺均著鈔給閱看將此各諭令知之欽此遵 旨寄信前
來旋於正月二十一日據翰林院咨稱編修饒士騰前於光緒十九年七月二十六日呈請告假回籍迎
親今已事畢來京於本年正月十九日具呈銷假等因臣等當於本月二十三日將饒士騰片傳到案督
飭司風祥加研訊據該員攜帶親供一紙當面呈遞查親供內稱竊士騰與丁惟昶往來緊密上年三月
間丁惟昶在土騰寓會謀言次說及現在考試不感寫作可以必得因說及二酉堂書舖係汝同鄉必然
認識央託向二酉堂關說遲數日二酉堂掌櫃饒丹詔來寓將丁惟昶所談一節與伊提及饒丹詔云須
用名條一紙旋會見丁惟昶云已寄人送去取有回片後二酉堂送來票據一紙書明四川主考丁寄存
銀二千五百兩是二酉堂名字叫我送交丁惟昶我亦交過了惟昶五月二十一日丁惟昶來寓約我同
往城外探聽消息丁惟昶向懷中摸取銀票云已預備銀三千兩可以一看我云票何須看汝自收藏六
月二十二日丁惟昶得差後饒丹詔率兩不識姓名人來我處要我代索丁惟昶謝銀呵斥而散旋亦通
知丁惟昶始說與錢繼又翻悔等語復於二十四日片傳丁惟昶到案並傳饒士騰備質當向丁惟昶按

照饒士騰所供逐層詰問該員始猶不肯承認迨經反覆研求方據供稱與饒士騰同年素無深交上年二月伊自城外移寓城內相近尋來會談及伊有本家書鋪能爲人探聽考差名次職一時糊塗囑其轉相探聽旋即後悔伊云話已通過並索謝銀五千兩突於五月二十日前手持票據一紙有憑帖取四川考官丁惟昶京平足銀五千兩字樣職聞言駭絕謂豈有如此無端嫁禍之理伊答以事情關係擅職可以置之不理即將此紙擲還嗣放陝西考官後饒士騰來言二酉堂等伊向職索謝職以前言詰責伊愧悔而退旋即依限起程此外一概不知饒升詔不但未見並不知其姓名等語臣等查丁惟昶與饒士騰所供大致相同詳細情節尙未脗合是日仍將該二員均交翰林院原役帶回正擬將饒士騰到案所供大概情形奏明請旨辦理旋於二十七日據翰林院文稱據編修饒士騰之胞弟饒士超呈稱饒士騰於本年正月二十五日在京病故等情查編修饒士騰係查辦案內要證今據呈報病故是否屬實有無別項情事刻卽飭中城指揮馳赴該員寓所詳細查驗取具該家屬丁役切結並令該司加具切實印結呈報旋於二十八日據該司報稱查驗得編修饒士騰委係無傷服洋藥身死並將饒士騰胞弟饒士超寫具稟帖黏連鈔寫饒士騰遺字一紙呈報前來臣等查饒士騰遺字內有死有餘辜雖悔何及著慎自盡等字樣顯係畏罪自盡查饒士騰雖經身故具有親供質之丁惟昶於囑託關說各節已經供

認惟於賄囑詳細情節尙復支離閃爍希圖推諉相應請 旨將編修丁惟昶暫行革職以便嚴訊而成
信獻 上諭福銀等奏續陳審訊要案情形一摺據稱編修饒士騰於是遞親供後服毒自盡丁惟昶所
供囑託關說各情與饒士騰親供大致略同惟於賄囑詳細情節尙復支離閃爍請將編修丁惟昶暫行
革職嚴訊等語丁惟昶著暫行革職卽著福銀等督飭承審各員嚴行審訊務得確情據實具奏